

SMAC lagando carnaval di Aruba sin smaak?



Pagina 2

- **Aerolinea a bandona pasaheronan na Aruba despues di cancela vuelo na ultimo momento**

Pagina 4

- **Luna Foundation ta reacciona: "Nos no ta responsable pa escogencianan di otro hende"**

Pagina 6

- **Hulanda mester haci mas contra racismo "structural" den servicio di gobierno**

Pagina 9

Falta di informacion tocante
proceso di formacion di gobierno
creando incertidumbre den
comunidad



Pagina 3

Peru: Papa ta dissolve movimiento
Catolico conservador despues di
abuso descubri pa Vaticano



Pagina 10

Rikese di biyonarionan a aumenta
den 2024, segun grupo anti-pobresa



Pagina 24

SMAC lagando carnaval di Aruba sin smaak?

Eleccionnan di Reina di Carnaval ta tras di lomba, y esaki ta trece cune comentario positivo y negativo di comunidad. E aña aki, un aspecto cu a destaca ta cu no tabatin hopi candidata participando den e diferente categoria, locual ta un di e puntonan principal di un debate riba rednan social pa loke ta trata e premiacionnan pa e reinanan cu a competi den fin di siman, especificamente den e categoria di Reina Grandi y Señora Carnaval.

Diasabra anochi, Aruba a conoce su Reina Infantil y Reina Hubenil pa Carnaval 71. Reina Infantil a keda den persona di Camila-Victoria Feliciano, y Reina Hubenil a bira Evah Ras. Diadomingo anochi a toca turno na e categoria di Reina Grandi, cu a keda den persona Kaylie Figaroa, y categoria di Señora Carnaval, cu a keda den persona di Djanira Kock.

Den categoria di Reina Infantil tabatin tres candidata so a participa. Den e caso aki Stichting Maneho di Aruba su Carnaval (SMAC) si a opta pa duna tur candidata un sjerp y hasta un corona, un gesto bunita, specialmente considerando cu ta trata di mucha y pues no por laga un mucha keda sin haya un premio.

Pasando pa categoria Reina



Hubenil tabatin cuater candidata, di cual dos di e candidatanan a bay cu tur e premionan, lagando dos candidata sin haya niun titulo. Ya aki comunidad a cuminsa expresa nan malcontento y a cuestiona dicon SMAC a saca solamente primera finalista y reina, y no a saca di tres y di dos finalista pa duna e otro dos candidata un premiacion y no laga nan man bashi.

E “bomboshi” mes, manera Arubianonan gusta referi na dje, a explota diadomingo anochi durante eleccion di Reina Grandi y Señora Carnaval. Den ambos categoria tabatin tres candidata so cu a participa. Manera den tur competencia, ta un ganador maximo so por tin, pero un

hecho cu a disgusta comunidad hopi ta cu aunke tabatin tres candidata so, SMAC a opta pa no saca un segunda finalista.

Den ambos categoria tur candidata a duna nan maximo esfuerzo y publico a gosa y disfruta di tremendo shownan di carnaval. Mas cu claro, manera den mayoria competencia di reina, un ta resalta mas cu e otro, pero den ambos categoria un candidata so a bay cu tur premio, un otro candidata a bay cu e titulo di primera finalista, lagando un candidata e ora sin ningun premio.

Esaki ta loke tin e comunidad di Aruba disgusta.

Riba rednan social hopi ciudadano a señala e hecho y a cuestiona con por ta posibel cu mirando cu tin tres candidata so ta competi den ambos categoria SMAC no a duna un sjerp pa segundo finalista sigurando asina cu tur candidata ta haya un premio.

Den categoria di Reina Grandi e candidata representando Dushi Carnival Group y Colegio EPB, Tiana Tromp, lastimamente tabata e candidata cu a keda sin premio y den e categoria di Señora Carnaval, Maria Brete, cariñosamente yama Mama Sila, representando Bomboshi Comedy Group, a keda sin ricibi un premio.

Mama Sila tin 71 aña di edad y a subi riba escenario pa haci un sueño di dje bira realidad. Cu su carisma y alegría el a captura e curason di pueblo di Aruba y a ser nombra cariñosamente “Mama di Carnaval”. E hecho cu el a keda sin



haya niun premio, ni un sjerp di segunda finalista, a haci cu hopi a critica y cuestiona den ki direccion carnaval di Aruba ta bayendo.

Den pasado e eleccion di Señora Carnaval tabata un eleccion dirigi mas riba e parti di señora, y e shownan tabata mas den estilo di comedia. Poco poco e edad a baha y e concepto di e shownan a cambia y a cuminsa tuma parecido na e shownan di Reina Grandi.

Cu e resultado di e weekend aki hopi a trece dilanti e mesun idea, pa cambia e rekisitonan pa por competi pa Reina Grandi y Señora Carnaval. E cambionan sugeri ta pa aumenta e edad maximo pa un candidata por participa den e categoria di Reina Grandi y aumenta e edad minimo pa un candidata por participa den e categoria di Señora Carnaval. Ya no tin e diferencia asina grandi di edad entre e candidatanan pa Señora Carnaval, cual en realidad ta un di e motibonan pakico e resultado ta manera cu e ta.

Ciudadanonan riba rednan social a señala cu e no tabata costa SMAC nada pa traha un sjerp di segunda finalista pa e candidatanan den ambos categoria no keda sin haya nada,

mas ainda teniendo na cuenta e cambionan cu e organizacion a haci pa “genera mas entrada” pa cubri gastonan di carnaval. Sjerp y premio ta cay bou di gastonan di carnaval, toch?

Algun otro usuario a indica cu otro posibilidad ta cu por agrega un otro categoria memey di e categorianan Reina Grandi y Señora Carnaval pa e señoreanan un poco mas hoben lagando asina e categoria di Señora Carnaval pa señoreanan di edad mas avansa y hibando e concepto di Señora Carnaval na su concepto original.

E criticanan contra SMAC ta fuerte y hopi ta disgusta pa con e organizacion ta tumando cierto decisionnan. Esaki no ta solamente relaciona cu eleccion di Reina, pero tambe cu diferente otro actividad di carnaval organisa pa SMAC cual ta demostra cu poco poco menos hende ta participa pa motibo di malcontento cu e organizacion.

Comunidad ta expresa cu e maneho cu SMAC ta hibando y decisionnan cu e organizacion ta tuma ta laga hopi di desea y lastimamente hopi ta sinti cu e tipo di maneho aki poco poco lo caba cu Aruba su carnaval.



Altocomisario Arnhem insigur di cuanto tempo mas e lo keda na Aruba

Altocomisario di Cuerpo Policial di Aruba, Ramon Arnhem, a indica recientemente cu e no ta sigur cuanto tempo mas e lo keda na Aruba desempeñando e trabou cu el a bin ta haci desde augustus 2022 pa motibo di cambio politico na Aruba.

Asina e Altocomisario a duna di conoce na e medio Aruba. nu durante un entrevista realisa cu e medio. Arnhem a combersa tocante su experiencia y vision riba liderazgo mientras cu na mesun momento el a remarca cu e no ta sigur cuanto tempo mas e lo keda na Aruba den su funcion actual debi na e cambio den e clima politico.

E hefe di Polis a indica cu e ta considera su tempo na Aruba un gran honor y a enfatisa cu su meta no tabata pa siña e publico kico liderazgo ta encera, pero pa inspira otro nan pa pensa riba nan propio liderazgo. El a comparti expe-

riencianan personal y a papia di e retonan y logronan cu el a experencia desde cu el a bin Aruba.

Arnhem a papia tambe riba e diferencianan cultural entre Hulanda y Aruba. El a remarca cu e comunicacion na Aruba hopi biaha ta mas emocional y directo. El a curasha su publico pa durf di pidi yudansa y muestra emocion den rolnan di liderazgo, hasta den un cultura caminda esaki ta menos comun. “Bon liderazgo ta autentico. Bo mester ta bo mes y respeta otro nan pa ken nan ta,” Arnhem a bisa na e portal.

E hefe di polis a indica tambe cu e tin hopi aprecio pa cultura Arubiano y ta haciendo su best pa siña Papiamento pa por conecta miho cu otro nan. Aunke e ta comete eror, e ta mira esaki como un paso importante pa bira mas cerca di e comunidad.

Esaki ta un aspecto cu a re-



salta entre comunidad mes. Hopi a tuma di nota di e esfuerzo di e hefe di Polis pa siña Papiamento y purba papia den e idioma, locual hopi a aplaudi.

Arnhem a enfatisa cu e ta considera su posicion como hefe temporal di polis un honor y responsabilidad, pero cu su servicio continuo finalmente

no ta den su man. “Na dado momento mi posicion lo termina. Tin un tempo pa bay y entrega mi tarea,” el a bisa.

Apesar di e incertidumbre, Arnhem ta mira atras cu orguyo y gratitud riba su tempo na KPA y e acogida caluroso cu el a experencia di e comunidad di Aruba. Su mensahe ta keda cu liderazgo no ta to-

cante poder, pero tocante conecta y inspira otro nan.

Arnhem a traha pa mas cu dies aña den Korps Politie Nederland. E tabatin un funcion importante di hefe pa e distrito di IJsselmeer na Hulanda. Bou di su funcion e tabata dirigi y lidera un distrito grandi cu mas o menos 800 polis trahando den diferente warda pa mantene e seguridad di un comunidad cu basta habitante.

Na aña 2022 el a dicidi di tuma un reto nobo den su carera pa por guia un Cuerpo hoben y dedica. Hunto cu su famia el a bin biba na Aruba y dia 15 di augustus 2022 el a huramenta como Altocomisario di Cuerpo Policial di Aruba. Desde e fecha aki el a tuma e responsabilidad pa guia y lidera e Cuerpo Policial di Aruba pa asina por yuda eleva e cuerpo, pero tambe trece su vision y mision pa e organizacion.

Falta di informacion tocante proceso di formacion di gobierno creando incertidumbre den comunidad

Formacion di gobierno keto bay ta den su proceso, tumando su tempo, cu segun algun persona ta señala ta tumando mas tempo di loke a anticipa, specialmente teniendo na cuenta cu pa 18 di februari e partidonan e formadornan e mester informa Gobernador su Excelencia Alfonso Boekhoudt por escrito tocante nan conclusionnan.

Algun ciudadano subraya cu e tempo aki ta un poco largo, algun otro a indica cu esaki ta normal considerando cu ta trata di formacion di un gobierno cu ta lo goberna un pais, pues no ta algo di haci cune.

Algun otro ciudadano a trece dilanti cu e falta di informacion, e silencio pa loke ta e negociacionnan, cone proceso ta canando, ta un poco alarmante y por ta un indicacion cu e dos partidonan no ta yegando na otro.

Segun rumor cu ta circula, un impasse cu e partidonan ta enfrentando ta relaciona cu e hecho cu lider di partido FUTURO, Gerlien Croes, kier reduci e cantidad di ministerio na siete ministerio, mientras cu partido AVP kier



mantene e mesun cantidad, esta nueve ministerio.

Mas detaye di e proceso di formacion no ta conoci y comunidad di Aruba tin expectativa halto pa loke ta e formacion di e gobierno nobo aki. E falta di informacion ta crea incertidumbre pa loke ta e futuro di e formacion di gobierno.

Tur gabinete ta pretende di ta e inicio di algo unico, algo nobo nunca bisto. Y tin cierto señal cu por indica cu di berdad algo ta cambiando, of no. Esaki por ta riparabel na e eventual repiticion di erornan di pasado, of un claro rechazo di continua cu esakinan.

E pregunta principal ta, kico ta haci cu e composicion final di e ministerionan? Ta conoci



cu desde hopi aña caba den formacion di gobierno no ta tene cuenta mas cu cierto logica den e composicion di e ministerionan, aunke esey inicialmente, na 1986, tabata e pensamiento formando e ministerionan segun cierto criterio relaciona cu e tareanan specifico cu nan tin, cu ta toca otro riba cierto tereno y por lo tanto tin cierto relevancia poniendo nan hunto.

Sin embargo, sigur den e caso di formacion di gobierno di coalicion, oportunismo politico a vence y a bira algo normal cu den formacion ‘tur opcion ta riba mesa’. E negociacion den e estilo aki en berdad ta contribui na e ‘flexibilidad’ na mesa pa por yega na un gabinete, pero mas cu un biaha ta surgi combinacion di cartera cu ta desafia logica completamente.

Accidente mortal di trafico Calbas

Ministerio Publico a exigi diabierna ultimo den caso contra e sospechoso J.E.P.T. un castigo di prision incondicional di cuatro años. Ademas fiscal a exigi pa hues kita e derecho di P.T. pa stuur auto pa un periodo di cinco años largo.

P.T. ta wordo acusa di a causa un accidente grave di trafico riba 24 di mei 2024 na Calbas y cu tabata pa su culpa cu un

motociclista a bin na fayece.

Segun Ministerio Publico no tin niun duda cu loke a causa e accidente di trafico tabata cu P.T. no a duna voorrang y a bay core riba otro banda di caminda, dor di cual el a boks frontalmente riba motocicleta di e victima. Ministerio Publico ta considera comproba cu e sospechoso a participa den trafico na un manera hopi imprudente, ademas cu e tabata bao influ-

encia di alcohol y tabata core sin rijbewijs.

Apenas un año prome Ministerio Publico a kita e rijbewijs aki for di dje, despues cu el a haya un castigo pa core bao influencia di alcohol. Na 2022 el a causa, riba e mes caminda aki, un otro dalmento frontal mientras cu e tabata stuur bao influencia.

Riba 7 di februari venidero Corte lo dicta sentencia den e caso.



Aerolinea a bandona pasaheronan na Aruba despues di cancela vuelo na ultimo momento

Pasaheronan cu tabata di biaha abordo di e vuelo BA 2156 di British Airways cu destino Antigua y Londres, a keda pega na Aruba, hopi di nan sin acomodacion y den pleno temporada peak pa turismo.

E informacion aki a circula riba medianan di comunicacion local, pero tambe regional manera Caribbean News Network y Loop News. Segun e ultimo noticiero aki, un pasahero a keda angustia despues di e asunto, bisando: “Nunca den mi vida mi a mira algo asina.

Tur cos a cuminsa pa alrededor di 7pm, na momento cu a informa e biaheronan cu tabatin cierto problema tecnico, mientras cu ya nan tabata abordo di e avion. Loke a cuminsa den un retraso di 90 minuut, a keda alarga



den varios actualisacion durante anochi, culminando cu cancelacion di e vuelo pa 12:20am.

A forsa e pasaheronan pa baha for di e avion y colecta nan maleta, sin asistencia inmediato di e aerolinea.

“Mi no por kere cu nan no a haci nada pa duna nos asistencia. Esaki ta inaceptable,” otro pasahero a bisa e noticiero, mientras nan a mira miembronan di tripulacion di e aerolinea sali for di aeropuerto pa subi riba e vehiculo cu a regla pa nan bay e acomodacion cu tambe tabata



prepara pa nan.

Tabatin algun biahero cu nan plan di celular tabata caduca e dia ey, y nan a keda sin por haci ningun yamada. Y den pleno temporada halto y di Carnaval na Aruba, tabatin disponibilidad limita na hotel, y algun pasahero a haya nan mes ta keda drumi riba vloer di aeropuerto.

Pa haci e situacion mas incomodo, e biaheronan mester a confronta condicionnan di tempo inusualmente friu cu biento fuerte sutando e area. Tabata te 2or di madrugada cu

British Airways a manda un e-mail na e pasaheronan afectada, den cual a bisa:

“Nos ta pidi nos sincero disculpa pa e retraso sin precedente y extendi abordo awe. Esaki tabata pa motibo di un problema tecnico identifica cu e avion prome cu despegue, cual nos ingenieronan tabata incapaz di resolve na tempo pa opera e vuelo. Seguridad ta nos prioridad di mas halto, y nos nunca lo opera un vuelo a menos cu ta safe pa haci esaki.”

E aerolinea a priminti den su email cu nan team di relacion di cliente lo tuma contacto dentro di 48 ora y a ofrece pa automaticamente ‘rebook’ vuelonan di conexon pa e pasaheronan afecta.

Mientras e aerolinea ta indica cu pasaheronan por aplica pa haya nan placa back, hopi tin incertidumbre si ta bay tin compensacion of na ki mo-

mento esaki lo por yega.

Riba X, e aerolinea a bisa cu vuelo BA 2156 cu mester a sali diadomingo tabata programa pa sali ayera. “Un avion di relief ta programa pa sali [dialuna] y ta bay busca e pasaheronan cu a keda pega. A manda comunicacion na e pasaheronan indicando cu nos ta trahando duro tras di escena pa minimisa e interrupcion.”

Mientras tanto, e compania a anuncia comienso di e luna aki cu ta bay stop tur vuelo pa Aruba cuminsando na maart proximo. Esaki exactamente dos años despues cu a introduci e vuelo aki, cu segun reportahenan a tuma dies años di preparacion. BA tabata bula pa Aruba dos biaha pa siman, y for di maart, e vuelonan aki no ta bay continua.

Potret di Loop News.

Anuncio di minister demisionario Dangui Oduber a genera critica

Ayera, mediante un comunicado di prensa, minister demisionario di Turismo, Dangui Oduber a informa cu “pronto e destaho publico pa construcion di restaurant Baby Beach lo bay na vigor. E proyecto di restaurant aki ta forma parti di e masterplan di Sero Colorado.”

Segun e comunicado, “despues di un periodo largo di preparacion y ehecucion, e masterplan aki ta dreitando su fase final. E masterplan aki a wordo reparti den diferente fasenan, manera por ehempel e restauracion di e trapi nan na Rodgers y Baby Beach, realocacion di e turtle wall, restructuracion di Rodgers Beach su parkeo, Baby Beach su parkeo, construcion di un

“trafohuis” nobo, renobacion di e dos canchonan deportivo di tennis na Baby Beach, y awo e construcion di e restaurant na Baby Beach, cual ta situa entre e dos canchonan di tennis.”

“E destaho publico pa construcion di e restaurant lo bay cuminsa dentro di poco pa asina e construcion tambe di e restaurant por cuminsa y wordo finalisa e año venidero,” e comunicado ta continua. Unabes e canchonan deportivo di tennis y e restaurant wordo entrega e masterplan di e Proyecto di Baby Beach lo keda cristalisa.”

Sinembargo, e anuncio a rici-bi algun critica den comunidad.

Riba rednan social, usuari-onan a cuestiona pakico mester di otro restaurant na Baby Beach.

“Pakico ta traha un otro restaurant si tin dos caba cu a pasa den bon y malo pa keda habri?,” usuario J.W. a comenta riba e pagina di Facebook di e minister. “Mi ta [haya] e di 3 restaurant un sla duro pa e dosnan cu ya t’ey caba! Tabata mas na su lugar di sigui duna fair chance pa e dosnan por sobrevivir en vez di bin cu un mas cu sigur lo bay perhudica nan seriamente!! Jammer!”

Igualmente, J.B. a indica cu echt no mester otro restaurant. “Tin 2 caba cu ta masha bon eyan! Mester cuminsa [inverti] den otro cosnan MAS importante. Drecha ca-



minda den mal estado” por ehemplo.

Finalmente, segun I.H. mester mas claridad riba e decision pa construi un restaurant. “Wel esaki mester un splicacion mihor. Tin dos restaurant cerca di otro, tin mas pavor di Sero Colorado y Den Stadium di SN.

Why more eyan mes na Baby Beach? Boso ta lubida cu Localnan ta kedando sin suficiente lugar pa pasa dushi momentonan na Baby Beach. Sigur e dos ultimo planning aki di Sr. Dangui ta innecesario. Nan ta di mas.”

E minister no a reacciona riba e comentarionan aki.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart

Redaccion

noticia@bondia.com

Pilar Flores (hefe di redaccion)
Angenette Figueroa (closer editor)
Leo Maduro
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop
Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirks

Colaboracion

Associated Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Nos costa y lama... Atrobe den noticia...

Aruba a manece, pa di tantisimo ovez, cu un caso di usurpacion di tereno publico, canto di lama, unda un empresa hotelero ta laga nan propiedad atras riba tereno publico, di e manera ey strobando publico en general di haci uso di e beach, segun nan derecho legal. E pregunta ta si mester warda te dia autoridadnan haci nan trabao, algo cu nunca ta garantiza. Sin embargo, tin otro manera pa regla e asunto.

Mas di cincuenta aña pasa tabatin un situacion parecido na e suceso actual dilanti St Regis Hotel. E tempo ey dilanti Aruba Caribbean Hotel gerencia di e empresa ey a haya un bon idea pa pone un heki te den lama, pa asina stroba pasada di hende, local y turista, cu e claro obhetivo di limita presencia di hende cu no tabata nan huesped riba e beach dilanti nan hotel. E experimento no a dura tanto; di mes hende tabata drenta awa y pasa riba e parti dilanti e hotel, y ademas un grupo di hoben tabata sistematicamente subi pasa riba e heki, di manera cu dentro di poco tempo el a debilita y sucumbi. Algun confrontacion cu security cu tabata kier implementa orden di nan superiornan no a yuda drecha ambiente y lo a hiba gerencia di bay busca apoyo cerca gobierno, suponiendo di ta den nan derecho pa stroba pasada di hende. Nan a sali decepciona ora a haya tende cu nan mester mantene e regla di no pone nada riba beach cu ta dentro di e limite di 10 meter di e 'hoogwaterlijn' bay paden. Esey ta e parti publico cu mester keda habri semper. E hotel a dicidi di kita e obstaculo completamente. Awendia mayoria di nos hendenan no ta na altura di loke a pasa tanto aña pasa; nos si sa ainda.

Segun nos, e regla ey ta vigente ainda. Si e hotel den e caso actual ta haya cu nan tin derecho di pone parasol riba tereno publico, esey no ta asina y ta significa cu un persona, local o un huesped di otro hotel, por bay sinta eynan tranquilamente pasobra nan no ta riba tereno di e hotel. Claro cu, como nos ta hende pacifico, nos no a trece e experiencia di pasado pa invita incidente o agresion, y e mihor manera pa evita esey ta pa autoridadnan concerni tuma rienda den e asunto aki y regla esaki manera nos reglanan legal ta stipula. Caso contrario, no mester ta sorprendi si tin ciudadano cu toch kier haci uso di nan derecho.

Nos costa y lama a atrae nos atencion den otro sentido tambe. Nos por a tuma nota di un relato di nos ministro demisionario encarga cu entre otro Naturaleza, unda e ta boga pa un

seguro pa nos piscadornan, cu den caso di un calamidad por perde loke nan tin inverti pa por realiza nan actividad economico. Nos ta kere cu por ta un bon iniciativa, pero tin un opinion diferente den con mester atende e asunto. Pa cumenza, ta parece nos necesario cu e mandatario mester tin su prioridadnan defini. Tin varios otro tarea den e area di naturaleza cu ta hopi mas importante y lo ta bon si e ta boga pa e siguiente gobierno atende eseynan como prioridad. Ta straño cu e ministro ta menciona e National Climate Resilience Council of Aruba, institui aña pasa, hopi laat, pero 'mas vale tarde que nunca', pero no ta pone e trabao di e conseho aki como prioridad number uno. Pakico esey? Pasobra Aruba ta carece di un institucion cu ta abarca un equipo profesional cu ta recolecta y analiza dato di diferente indole, pa nos por tin un idea kico ta estado di nos naturaleza y kico ta e prioridadnan pa atende di inmediato. Pa specifica esaki mas: nos tin dato di varios aña, con serio y na unda e areanan di mayor deterioro ta, tanto riba tera como den lama? Manera nan ta bisa na Hulandes: "Meten is weten." Si bo no tin dato obhetivo, di hopi diferente indole, bo ta bay keda pega den trabao elogiabile, pero cu no ta avanza di e nivel di e 'dede di advertencia' cu ta bay laira de vez en cuando, manteniendo e fase 'bon intencion'.

Y, ohala si nos tin e tipo di informacion aki, pa negativo cu e ta, por fabor comparti esaki cu comunidad. Mientras cu talvez awor nos ta haya e reaccion di: "Claro, esey mester," nos ta desea di adverti seriamente cu esey no ta e practica di nos autoridadnan, di cualkier color politico. Semper e scondemento di e tipo di informacion aki a prevalece y solamente den algun caso nos ta topa cu ciudadano consciente cu ta dicidi di kibra e silencio tan venera den gobernacion. Ehemplo di esaki ta e caso di e rapport encuan to e casi desaparicion di calco na e costa pabao di Aruba, cu a yega na nos man como medio, pasobra un persona valente a dicidi cu tabata basta cu secretismo gubernamental.

Pa nos bolbe na e asunto di sigura piscador: tin cierto tipo di riesgo cu en general gobierno sa asumi, pasobra no ta factible pa laga esaki na sector priva – compania di seguro – pa atende. Den e caso aki nos ta mira cu, si tin un calamidad cu ta afecta piscador di forma serio, probablemente lo tin otro ciudadano cu tambe ta sufrí daño grave. Nos ta duda cu cualkier gobierno lo tin tanto gana pa bay discuti e tipo di escenario aki awor, si no ta den un contexto hopi mas amplio.

Luna Foundation ta reacciona:

“Nos no ta responsable pa escogencianan di otro hende”

Ayera riba rednan social, fundacion pa rescate di cacho y educacion riba derechonan di animal, Luna Foundation a reacciona riba post di un otro persona, enfatisando cu e fundacion no ta responsable pa e decisionnan di cada persona na Aruba.

“Esaki no ta pa causa un guerra cu e homber aki, pero ta pa laga cla cu nos fundacion no ta responsable pa e escogencianan estúpido cu otro hende ta haci,” e fundacion a indica.

Tabata referi na un post di un meneer di inicial G.P., kende a expresa tristesa y indignacion pasobra aparentemente, tabatin algun cacho a mata algun di e bestianan cu e meneer ta cria. Den su post, e ta parce di responsabilisa Luna Foundation bisando pa nan “bay luna back”, como tambe responsabilisa “e minister cu a duna nan permiso pa unda nos ta cria.”

Luna Foundation den su reaccion a bisa:

“Desafortunadamente, su cabrito/carne ta siendo mata pa cacho salvahe. No cachonan di Luna manera e ta insinua. Esnan cu a yega di bin nos santuario, boso sa cu nos cachonan no por sali ni si nan purba. Nos animalnan di cunucu no por sali. Nos ta tene nan safe.

“Frecuentemente nos tin cabrito/carne ta cana riba nos tereno y nos ta laga nan na paz. Nan ta come nos matanan y bebe nos awa y nos ta laga nan na paz. Nos a cura algun di nan cu herida, no pasobra nos no tin nada miho pa haci, sino pasobra nos ta stima tur animal.

“Nos isla tin un problema. Un problema creciente. Hende ta bentando nan animalnan tur caminda. Den ciudad, riba beach, dilanti otro fundacion di rescate hasta den barionan residencial. Esaki ta nos culpa tambe?”

“Normalmente e criadornan ta tira e bestianan cu mata esun di nan. Nos semper a compronde esey. Bo ta protege loke ta di bo riba bo propiedad. Nos tambe ta sigura cu esun di nos ta safe. Nos cachonan ta riba nos propiedad. Nan no ta molestia niun hende. Nos a construi nos santuario den cuatro aña pa sigura cu nan no

por cana liber y molestia niun hende. Awo nos ta responsable pa cada cabrito/carne cu ser mata? Nos ta carga e estupidez di otro riba nos schouder?”

“Si bandona un cacho cerca di unda nos ta, esey no ta keda na nos. E cacho ey no por drenta nos propiedad. Esun di nos no por sali, y

niun por drenta si nos no lag’e drenta. No causa un guerra cu postnan asina mientras no ta keda na nos cu tin hende ignorante ta cana entre nos. Stop di enfoca riba nos y enfoca riba con pa tene bo animalnan riba bo propiedad. Con pa tene na safe. Tempo ta cambia. Tempo nos tabata mucha cos tabata diferente. Nos isla ta diferente.”



Otro Dia di Betico na MANA cu informacion y recreacion

Diasabra dia 25 di januari 2025, Museo Arqueologico Nacional Aruba – MANA, lo habri pa publico di 10’or di mainta te 3’or di atardi pa bishitante di tur edad. Pa e ocasion special aki lo tin actividadnan extra manera charla, activacion di exposicion temporario y tayer.

Arkeologo Raymundo Dijkhoff lo duna e prome lectura di un ciclo di tres charla tocante e santana historico na Sta. Cruz 35. E lo elabora riba e excavacionnan cu a tuma lugar den 2001, 2012 y 2016. Lo amplia di e experiencia di e team di arkeologo y tambe di e impacto di e hayazgonan riba nos mira riba Aruba su historia. E presentacion lo ta



di 11’or pa 12’ or den auditorio. Tin oportunidad pa haci pregunta y intercambia cu e arkeologo.

Bishitantenan por experencia e exposicion temporario nobo “Interlasado: Pasado Presente”, di e artista Velvet

Zoé Ramos. Den e exposicion aki, cu lo sigui desaroya durante 2025, e artista ta combina dos concepto: ‘E Fiesta y Interlasado’. Pa medio di instalacion interactivo y evento publico, e exposicion ta crea un dialogo, invitando cada participante pa reflex-



iona riba e metafora di simia y ciclo di crecimiento.

Ramos ta un artista interdisciplinario biba na Aruba. E ta explora empatia pa medio di arte di instalacion, print y video. El a participa na diferente exposicion y proyecto local y internacional. El a representa Aruba na e Mykonos Biennale 2021 y a ser selecta pa e di 19 Biennale Asiatico na Bangladesh 2022. Tambe el a ricibi e ‘Studio Caribe Film Fonds Development grant 2024-25’ pa su pelicula experimental cortico ‘Adrift’/ ‘Wak leu’.

Artista visual Jo-ann Kock - Ridderstap lo duna un tayer di ‘Healing Art’ pa tur edad. Experimentando arte neurografico por crea ‘mindfulness’ y tranquilidad. E tayer ta pa tur persona cu ta desea pa explora

creatividad y otro forma pa balansa bida.

E artista ta traha cu diferente medio manera verf di awa, azeta y crayons. E tayer lo ta a base di ‘first come first serve’ y lo tin dos tanda. Un lo cuminsa 10’or di mainta y e otro pa 1’or di merdia den edificio di glas na Schelpstraat prome piso. Ta pidi un contribucion di dies florin pa persona.

Den e mes un edificio parti abou Chef Orlando di Chichi Catering lo tin dushi cuminda crioyo na benta, manera cabrito stoba, sopi carni, pasaboca, y tambe bebida refrescante.

Bin pasa un Dia di Betico placer den ambiente familiar y inspirador na Museo Arqueologico Nacional Aruba!



Hulanda: Hende ta comiendo menos fruta y berdura

(NLTimes)—Hende Hulandes a cuminsa come menos fruta y berdura aña pasa. Companianan di agricultura y distribucion ta papia di un caida preocupante den consumo. Sinembargo, e sector a logra comercia mas fruta y berdura en general debi na un aumento den importacion y benta den exterior.

Consumo di producto Hulandes a cay pa tres por ciento na 2024 manera e asociacion di producto Hulandes, Gro-

entenFruit Huis, a reporta. Hende Hulandes a come un promedio di dos por ciento menos berdura y cuatro por ciento menos fruta compara cu e aña anterior.

“Como resultado di esaki, consumo Hulandes ta keda hopi atras di e cantidad diario recomenda pa e Voedingscentrum,” GroentenFruit Huis ta adverti. E recomendacion ta pa come 250 gram di berdura of 200 gram di fruta tur dia. En general, un persona Hulandes ta comiendo awor solamente 60 por ciento di e

standard aki.

E motibo pa e caida aki no a ser stipula den e cifranan anual. Sinembargo, GroentenFruit Huis ta nota cu e caida a sucede den ambos supermercadonan y servicio di catering. E industria ta reconoce cu fruta y berdura a bira mas caro compara cu aña pasa, aunke e aumento den prijs ta comparable cu prijsnan di otro producto y servicio.

E produccion di fruta y berdura na Hulanda ta representa un balor di 4.7 bion euro na 2024. Produccionan importa a aumenta cu cuatro por ciento pa 11 bion euro. Desde 2023 tabatin un aumento di tres por ciento den exportacion. Esaki ta conta pa 15.6 bion euro den total.

E rol di Hulanda como un



pais di transitio importante pa producto ta kico a proteha e industria contra un dañonan. Importacion for di China en particular a aumenta significativamente aña pasa debi na un suministro mas grandi di conoflok y ginger. Un cantidad grandi di awacati a bin for di Kenia. Un cantidad halto di blueberry, druif y kiwi a bin for di Chile.

er exporta a ser mayormente manda pa Alemania, Belgica y Reino uni. Awacati y tomati exporta manda pa Austria, Belgica y Spaña a aumenta significativamente, segun GroentenFruit Huis. E aumento den e cifranan aki a contribui na e crecemento di e industria a pesar di menos consumo for di hende Hulandes.

Blueberry, druif y concomb-

Un muestra for di un region isola na Tanzania ta test positivo pa e malesa Marburg, confirma preocupacionnan di OMS



(AP)—E presidente di Tanzania a bisa ayera cu un muestra for di un parti isola den e norte di Tanzania a test positivo pa e malesa Marburg, un virus extremamente infeccioso cu por resulta den morto te cu 88 por ciento di tur caso si esaki no ser trata.

Presidente Samia Suluhu Hassan a papia na Dodoma, e capital, hunto cu Director-General di e Organizacion Mundial di Salud (OMS), Tedros Adhanom Ghebreyesus. OMS tabata e prome entidad pa reporta un brote di Marburg dia 14 di januari, cual a resulta den e morto di ocho persona den e region Kagera di e nacion. Oficialnan di Salud Tanzano a disputa e rapport algun ora despues, bisando cu testnan riba varios muestra a duna resultadonan negativo.

Hassan a bisa ayera cu testnan adicional a confirma un caso di Marburg. 25 otro muestra a Sali negativo, el a bisa.

Manera Ebola, e virus di Marburg ta origina den murciago di fruta y ta plama entre hende via contacto cerca cu likidonan corporal, of individualnan y superficienan infecta, manera klechi di cama contamina.

Sintomanan ta inclui keintura, dolor di musculo, diarea, sacamento y den algun caso morto debi na perdida extremo di sanger. Actualmente no tin ningun vacuna of tratamiento autorisa pa combati Marburg.

Esaki ta e segundo brote di Marburg den Kagera desde 2023. El a surgi exactamente un luna despues cu Ruanda, cual ta comparti frontera cu Kagera, a declara cu su mesun brote di e malesa a yega su fin. Oficialnan Ruandes a reporta un total di 15 morto y 66 caso den e brote cu a ser declara dia 27 di september 2024, cu mayoria di esnan afecta siendo trahadornan di cuidio medico cu a trata e prome pashentnan.

Cumpra bo Mini Mega y cu Afl. 2,- mas, bo por gana e jackpot di

AFL. 1.000.000,-

Con?

Afl. 5

Afl. 650.000,-

+

Extra!

Afl. 350.000,-

www.lottoaruba.com

Pa mas informacion yama 525-7555 of bishita nos website lottoaruba.com

Corsou: Carmanco ta ricibi ordo di paga 1.2 miyon dollar den compensacion

(CuracaoChronicle) - E trustbedrijf Carmanco a ser ordena paga compensacion di dañonan cu ta surpasa 1.2 miyon dollar den caso legal cu e administrador di bancarota di e empresa di wegá di placa online Stackrace N.V a trece dilanti.

Den e mesun caso aki. Cyberluck, e ex propietario di un licencia master, tambe mester a paga 1 miyon dollar den compensacion di daño. Sinembargo, Cyberluck a ser declara bancarota na fin di 2024, lagando incertidumbre tocante e impacto di su estado den e decision.

E procesonan legal ta centra riba dañonan causa despues di decision den 2020 di e Corte di Husticia. Den e decision aki, Carmanco a ser declara culpabel como director pa e caída financiero di Stackrace, resultando den su bancarota. E caso recién tabatin e meta di pone balor riba e dañonan cu e ta debe den e areglo di bancarota.

Corte tambe a determina cu Cyberluck a actua fuera di ley pa medio di facilita operacionnan di wegá di placa sin cu a implementa e medidanan di supervision. E negligencia aki a contribui na e perdidanan financiero pa es-



nan cu a bisa cu nan no por a recupera di e debenan na Stackrace.

Stackrace a keda estableci den 2021 y a cuminsa opera un plataforma di wegá di placa online yama Lockpoker y Lockcasino den 2013 bao Cyberluck su licencia. E operacionnan despues a

ser mancha pa Cipaco, otro entidad crea pa Carmanco. Ambos compania a ofrece servicio di wegá di placa online pero no a cumpli cu e obligacionnan financiero cu nan stakeholder.

Carmanco a fungi como Stackrace su director for di su fundacion te cu februario 2015, ora cu el a formalmente retira di e posicion. Lunanan despues, den mei di e ana, Stackrace a ser declara bancarota, cu abogado Arend de Winter designa como e administrador di e bancarota.

Den e decision di 2018, ambos Carmanco y Cyberluck a ser considera responsabel

pa e mal maneho y negligencia. Nan a ser ofreci paga un avance inicial di 100,000 dollar cada un. Cyberluck a cumpli cu e pago aki.

Corte di Husticia a reafirma e decision aki den 2020 cu ningun apelacion. Pa februario di 2022, e administrador a reconoce e cantidad cu tabata yega na mas di 1 miyon dollar. Corte tambe a aproba e gastonan relaciona cu e proceso di bancarota, yegando na alrededor di 187,000 florin cu un calculacion adicional di 75,000 florin pa gastonan andando.

Ministerie van Defensie: Caribbean Djokja

For di 22 te cu 31 di januari 2025, e ehercicio 'Caribbean Djokja' ta tuma luga na Corsou. Mas cu 120 Militar y 30 vehiculo di Defensa ta trein durante e ehercicio aki; nan ta plama rond e isla.

E Militarnan cu ta participa ta procedente di 'Compagnie in de West' cu ta un unidad di Defensa den Region Caribe, cu tin nan rotacion cada cuater luna. E unidad aki, cu e nomber '13 Delta Compag-

nie', ta staciona na Corsou desde November 2024.

E ehercicio ta consisti di dos parti; un asina yama 'Field Training Exercise (FTX)' Ehercicio riba Tereno Habri y un 'Live Fire Exercise (LFX)' Ehercicio Practico di Candela. E scenarionan di ehercicio ta tuma luga na diferente localidad, tal manera Tereno habri na Hato, Playa Fuik, Koraal Tabak, St. Cruz y Wacao. E Militarnan ta move entre e localidadnan

cu vehiculonan Militar y ta drumi na sitionan strategico plama rond e isla.

Corsou ta brinda circunstancianan cu desafio, tal manera e clima cayente y diferente paisahe, cu ta perfecto pa prepara Militarnan pa misionnan real. Pa medio di trein riba terenonan desconoci e Militarnan ta siña pa haci cambionan rapido y pa traha miho hunto, den cashonan compleho. Durante Caribbean Djokja Militarnan ta mehora



nan tecniconan di combati, nan ta aplica tecnologianan nobo y nan ta optimalisa e cooperacion entre nan.

nan aki Militarnan por actua na un forma flexibel y eficaz, na e sitio y na e momento cu esey ta necesario.

Danki na e sorto di ehercicio-

Save Zakito Movement ta trece dilanti preocupacion tocante e area di Zakito

(CuraçaoChronicle) - Save Zakito Movement a expresa preocupacion serio tocante e alocacion anuncia dia 3 di januari 2025 pa Ministerio di Transport. Trafico y Plan di espacio (VVRP) pa e desaroyo di un tereno di 78,050 meter cuadra den e area di Zakito. E desaroyadornan mester a entrega nan plannan di desaroyo pa dia 17 di januari, lagando nan cu solamente dos siman pa responde.

Como residente di e area di Zakito, "nos no ta opone turismo y desaroyo urbano riba nos isla, nos ta reconoce e importancia di proyectonan cu por crea trabao y stimula crecimiento economico," Save Zakito Movement a expresa den un comunicado di prensa. Sinembargo, nan ta exigi cu e desaroyonan aki keda ehecuta cu transparencia, di manera sostenibel y den e interes di henter e co-

munidad di Corsou, cumpliendo cu e guianan di EOP, evitando tratamiento cu preferencia y siguiendo e principionan di igualdad.

Entre e preocupacionnan cu a trece dilanti, tin e proceso di alocacion. Segun Save Zakito Movement, nan a evalua e Registration Guidelines emití pa UO Domein y ta preocupa cu e proceso actual ta muestra manera mas un formalidad na luga di un proceso genuino y husto. E cuadro di solamente 2 siman pa entrega un proposicion no ta suficientemente largo pa un proyecto di escala aki. Esaki ta trece dilanti preocupacion tocante e transparencia di e proceso y si tur e participantenan potencial por a ricibi un oportunidad husto pa competi.

Adicionalmente, e ta evidente cu e plan pa e desaroyo di e area ya caba ta existi, prepara entre e gobierno y e desaroy-

ado, cu trabao di infraestructura ya caba ehecuta pa otro desaroyado. "Dicon e plan aki no ta disponibel como referencia pa tur partido interesa?"

Otro preocupacion ta e aplicacion consistente di e EOP. EOP ta provee un regulacion cla tocante e uso di e tereno, infraestructura y impacto ambiental. Den e caso aki, e gobierno a ignora limitacionnan critico manera limite di capacidad den areanan manera Klein Hofje, e maximo di altura pa edificio ta di 4 piso manera EOP ta dicta, y e necesidad di mantene conectividad y areanan publico.

Tambe e negligencia di impacto social y ambiente ta un punto di preocupacion. E area aki anteriormente mster a keda preserva como un espacio recreacional pa e residentenan y bishitantenan. E ocupacion completo di e espacio aki pa propositonan priva y turismo lo causa es-



torbo den e ambiente cu ya caba ta fragil, incluyendo manglanan, coral reef y fluho di awa, causando problemanan manera mal holo y infestacion di sangura. Esaki ta afecta significativamente e manera tradicional di biba y e calidad di bida pa tur e residentenan.

Save Zakito Movement a exigi pa e procedura actual keda coregi na un manera cu ta garantiza competencia husto, provee acceso na e plan existente y garantia di proceso di alocacion transparente. Tambe a pidi pa respetar EOP como un herment

fundamental pa e plan di e espacio y pa duna prioridad na e necesidad di e poblacion local pa medio di mantene e oportunidadnan di recreacion y preveni desaroyo cu ta solamente sirbi turismo y interesnan priva, mientras cu e residentenan ta relega na Seru Pretu pa disfruta.

A pidi un contesta na e petitionnan cu Save Zakito a entrega bao LOB na fin di 2023 y den 2024, otorgando acceso na informacion. E falta di respuesta ta refleha un indiferencia preocupante y falta di respet pa e derechonan di e ciudadanonan di Corsou.

Casonan di extorsion riba snapchat ta aumenta na Amsterdam, polis ta pidi vigilancia

(NLTimes) - E informenan di extorsion digital dirigi riba hobennan na Amsterdam a aumenta significativamente, cu incidentenan nobo cu ta surgi den varios bario, polis a confirma e siman aki. Autoridadnan ta sigui adverti contra di paga e extorsionistanan y ta urgi e victimanan pa bini dilanti.

E casonan di extorsion, cu inicialmente tabata enfoca riba Amsterdam-Zuid, awor a plama pa Amsterdam-Oost y Amsterdam-West. Investigadonan a revela cu hobennan ta ser dirigi riba Snapchat, caminda nan ta ser bisa falsamente cu nan mester paga un “boet” pa supuestamente causa inconveniencia na un individuo desconoci. E sumanan exigí hopi biaha ta yega na varios shen euro, y e autornan a menasa e victimanan cu consecucionan severo, incluyendo daño na nan famia, si pagonan no ser haci.

Den algun caso, victimanan a ser presiona pa duna e nombrenan di otro hobennan a cambio di “descuento” riba nan supuesto boetnan.

E individuonan aki ta ser dirigi despues den schemanan similar.

Polis di Amsterdam a reitera nan apelacion na victimanan pa raporta e delitonan aki, hasta si nan ta sinti miedo of inseguridad. “Nos ta compronde cu bin dilanti por ta desalentador, pero nos ta curasha victimanan pa tuma contacto cu nos. Nos ta aki pa sostene nan y explora opcionnan sigur hunto,” polis a bisa den un declaracion.

Rapportnan por ser entrega anonimamente, y victimanan por usa un adres alternativo pa mantene privacidad. Polis tambe ta curasha discusionnan habri den famianan y entre amigonan pa garantisca cu hobennan afecta no ta sinti nan mes isola.

Autoridadnan a comparti varios tip pa yuda victimanan y preveni mas incidente. Ta conseha hobennan pa evita di saca screenshot di mensahenan menasante, ya cu esaki por alerta sospechosonan, y en bes di esey usa un di dos aparato pa saca potret di e combersacion, sigurando cu e fecha y ora ta visibel.



Nan mester captura imagenan di e nomber di usuario y potret di profile di e sospechoso tambe, pone cuentanan di Snapchat na priva, y abstene di acepta peticionnan di amistad di usuarioman desconoci.

Importante ta cu e victimanan ta ser urgi pa no paga placa, topa cu sospechosonan, of duna nomber di otro. Despues di recoge evidencia, nan mester blokia e sospechoso mesora y informa e incidente na polis door di yama 0900-8844.

E aumento den casonan di extorsion a lanta preocupacionnan tocante e rol di e funcionnan di anonimidad di Snapchat den facilita crimenan asina. Globalmente, e plataforma a confronta control, cu casonan similar raporta na Merca y otro paisnan.

Na 2022 so, Snap Inc., e compania madre di Snapchat, a ricibi aproximadamente 10 mil informe di extorsion cu ta envolve hobennan. Criticonan a acusa e compania di no a implementa suficiente

medidanen di seguridad, citando preocupacionnan di gasto. Mientras cu Snap Inc. a afirma cu e ta “mehorando continuamente” e seguridad di su plataforma, e efectividad di e esfuersonan aki ta keda bou di duda.

Autoridadnan tambe a conecta e tendencia cu otro formanan di crimen digital, manera “atraco digital,” caminda victimanan ta ser obliga pa manda placa via appnan di pago mobil manera Tikkie.

Hulanda mester haci mas contra racismo “structural” den servicio di gobierno segun e Comision di Estado

(NLTimes) - Gobierno Hulandes mester haci mas pa combati racismo y discriminacion den servicionan publico, Comision di Estado contra Discriminacion y Racismo a bisa den su di dos conseho na Ministerio di Asuntonan Interno y Tweede Kamer, e camara mas abao di Parlamento Hulandes. “Discriminacion no ta un incidente, pero un problema structural dentro di gobierno,” e Comision di Estado a conclui, estableci despues di e scandal di beneficianan riba peticion di parlamento, NOS ta informa.

E Comision di Estado a mostra riba e impacto di e comportacion di politico- y ministernan. “Ora politico- y ministernan ta haci declaracionnan implicitamente of explicitamente discriminatorio tocante gruponan den sociedad Hulandes, esaki ta contribui na e imagen cu



ta hustifica pa trata hende desigual,” el a bisa. “Accion di gobierno discriminatorio ta mina e estado di derecho y tin consecucionan dañino pa individuonan y e sociedad.”

Comision di Estado ta kere cu gobierno no a haci suficiente pa combati discriminacion y racismo den servicionan di gobierno, apesar di e hecho cu discriminacion y racismo ta viola e Constitucion Hulandes. “Na e momentonan

aki, accion ta principalmente reactivo pasobra hopi organizacion di gobierno no tin suficiente control y bista riba e efectonan di nan accionnan.”

Discriminacion y racismo di parti di gobierno tambe ta costa sociedad hopi placa, e Comision di Estado a señala. E operacion di recuperacion di e scandal di beneficianan ya ta para na 9 biyon euro. Aña pasa, gobierno tambe mester a aparta 61 miyon

euro pa compensa studiantenan cu a ser discrimina door di chekeonan di DUO riba e subsidio di biba pafo di cas. E Comision di Estado ta adverti cu e operacionnan di compensacion na gran escala aki lo sigui montona si gobierno no ahusta su accionnan drasticamente.

E Comision di Estado a haci tres recomendacion pa mehora e acercamento di gobierno contra discriminacion.

Prome, gobierno mester introduci un test di discriminacion pa determina cual decision- y proceduranan por resulta di ta discriminatorio.

Tambe a urgi e gobierno central, y e minister di Asuntonan Interno en particular, pa traha un plan pa atende cu discriminacion den e servicionan publico riba termino largo.

Finalmente, e Comision di Estado a enfatisa cu parlamentario- y ministernan mester duna un bon ehempel door di tuma discriminacion na serio ora di traha ley y politica. E la sugeri pa recompensa funcionarionan publico cu ta adverti cu cierto politicanan por curasha discriminacion en bes di ignoran.

Tweede Kamer lo debati riba discriminacion di parti di gobierno dia 29 di januari proximo.

Mexico, Colombia, Brasil y siete pais mas ta expresa “preocupacion grave” pa anuncio di deportacion masivo di migrante

(NTN24) – Hefenan diplomatico di dies pais di America Latino y Caribe a expresa nan “preocupacion grave” pa e anuncio di un deportacion masivo di migrante, un medida cu nan ta considera incompatible cu derechonan humano, segun un declaracion conhunto publica den weekend.

E pronunciamiento, cu no ta atribui e medida aki na ningun pais, ta aludi e anuncio di presidente Mericano, Donald Trump, kende a priminti di duna orden pa e mas grandi operativo di deportacion di stranhero den historia di su pais, asina cu e asumi su cargo, cual tabata ayera dialuna.

“Ta motibo di preocupacion grave e anuncionan di deportacion masivo, sobre todo pa nan incompatibilidad cu principionan fundamental di derechonan humano y pa no aborda di manera eficaz e

causanan structural di migracion,” e declaracion, divulga pa Canciheria di Mexico, ta señala.

Ademas ta haci un yamado pa tur pais di e hemisferio pa conduci cu apego na derecho internacional, derechonan humano y legislacionnan interno pa gestiona migracion “cu un enfoque humanista, particularmente dilanti e menasa di deportacion masivo.”

“Nos ta reafirma cu tur persona migrante, independientemente di su situacion migratorio, tin derechonan fundamental y inalienable y cu tur Estado ta obliga pa respeta y protege esakinan, y procura pa adopta medida pa su realizacion pleno,” e declaracion ta agrega, den su 14 punto.

E paisnan firmante, Brazil, Belice, Colombia, Cuba, El Salvador, Guatemala, Haití, Honduras, México y Venezuela (casi tur emisor di migrante), ademas ta com-



promete na “defende derechonan humano di tur persona migrante.” Esaki ta inclui “rechasa nan criminalisacion den tur etapa di e ciclo migratorio” y “protege nan principalmente for di delincuencia transnacional organisa cu ta lucra di migracion,” e documento ta agrega.

E declaracion conhunto tambe ta sugeri pa activa e reunionnan riba migracion di Comunidad di Estadonan Latinoamericano y Caribeño (CELAC) pa meta di tin “un espacio amplio di discusion di propuesta” pa atende cu e problematica. E reunion regional riba “Mo-

bilidad Humano den Ruta Nort di e Continente” tabata convoca pa Mexico atendiendo un iniciativa di presidente Claudia Sheinbaum y presidente Hondureño, Xiomara Castro, e canciheria Mexicano a informa den un comunicado.

Peru: Papa ta dissolve movimiento Catolico conservador despues di abuso descubri pa Vaticano

(AP) — Papa Francisco a tuma e stap remarcable di dissolve un movimiento Catolico basa na Peru, e Sodalitium Christianae Vitae, despues di años di intento di reforma y un investigacion di Vaticano. E investigacion a descubri abuso sexual na man di su fundador, mal maneho financiero di su lidernan y abuso spiritual na man di su miembronan top.

E Sodalitium ayera a confirma e disolucion, cual a keda expresa den un asamblea na su miembronan na Aparecida, Brazil weekend ultimo pa e consehero top di Papa Francisco, Cardinal Gianfranco Ghirlanda. Den revela e disolucion den un declaracion, e grupo a lamenta cu noticia di e decision di Francisco a leak pa motibo di dos miembro cu a atende e asamblea, kende a keda “definitivamente expulsa.”

No a duna ningun detaye, bisando solamente cu e “informacion central” tocante e disolucion cu a keda reporta riba website Infovaticana na Spaño “tabata berdad pero a contene varios error.” No a bisa kico e erornan tabata.



Vaticano no a responde na varios solicitud pa comentario. Disolucion, of supresion di un movimiento religioso reconoci pontificamente ta un decision mayor di e Papa, mas ainda pa un papa Jesuita mirando cu e orden Jesuita mes tabata suprimi den añan 1700.

Disolucion di SCV, cual tabata den rumor caba, ta marca e fin di loke tabata un morto slow di e movimiento, fundado na 1971 como un di varios sociedad Catolico como un reaccion conservador pa e movimiento di teologia di liberacion isquierdista cu a plama na America Latino.

Pero ex-miembronan a keha

na arkidiocesis na Lima na 2011 di abuso di su fundador, Luis Figari, y otro acusacion ta bay back na año 2000. Pero ni e iglesia local ni e Santa Sede a tuma accion concreto te cu un di e victimanan, Pedro Salinas a skirbi un buki hunto cu periodista Paola Ugaz detayando e practicanan enfermo di e Sodalitium na 2015, titula ‘Mita Frère, Mita Soldad.’

Na 2017, un rapport comisiona pa liderazgo di e grupo a determina cu Figari a sodomisa su reclutanan y a somete nan na abusanan psicologico humillante y otro abuso sexual.

Despues di un intento di re-



forma, Francisco a manda su dos consehero mas confia, Arsobispo Charles Scicluna y Monsignor Jordi Bertomeu pa investiga e abusanan na Sodalitium. Nan rapport a descubri abusanan “sadistico” estilo-secta di poder, autoridad y spiritualidad, abuso economico den administra placa di iglesia y hasta abuso periodistico di acosa critico.

Nan rapport a resulta den expulsion año pasa di Figari y otro miembro top 10, incluyendo un arsobispo kende a demanda Salinas y Ugaz pa nan reportahe y tabata forsa pa retira trempa. Salinas, kende pa largo a haci un yamado pa suprimi SCV, a bisa cu e decreto di Francisco

tabata “extraordinario” maske laa, ya cu e prome denunciacion ta bay back 25 año atras. El a elogia Scicluna y Bertomeu, como tambe e prefecto nobo di oficina di Vaticano pa orden religioso, Soeur Simona Brambilla, ya cu e ta na final responsable pa SCV.

No ta conoci kico ta bay sucede cu e activonan di e Sodalitium, cual victimanan kier pa ser usa como compensacion pa nan trauma. Segun e codigo di ley canonico, solamente e Santa Sede por suprimi un instituto manera SCV y “un decision tocante e bienes temporal di e instituto tambe ta reserva na e Sede Apostolico.”

Puerto Rico: E Hunta Fiscal ta aproba un pago di un solo biaha di \$3,000 pa miembronan di e Sindicato di Trahadonan di UPR

(ElNuevoDia) - E Junta de Supervision Fiscal (JSF) a aproba e proposicion y fondonan pa un pago di un solo biaha di \$3,000 na 949 miembro activo di e Sindicato di Trahadonan di Universidad di Puerto Rico (UPR), un di e stipulacionnan economico clave den e negociacionnan entre e sindicato y e administracion central di e centro educacional lider di e pais.

“E Hunta di Supervision a haci e determinacion aki a base di e peticion di reprogramacion y e informacion di sosten correspondiente, cu e compromendemento cu UPR lo tin suficiente fondo alocado den e parti di presupuesto ‘Salarionan - Facultad’, pa cubri su necesidadnan presupuestario pa “año fiscal 2025,” ta para den e carta fecha 14 di januari, firma pa e director ejecutivo di e Hunta, Robert Mujica.

E carta, dirigi na presidente di UPR, Luis Ferrao Delgado, ta bisa cu e peticion pa

autorisacion pa duna un pago no recurente di \$3.000 na 949 miembro activo di e Sindicato di Trahadonan a ser haci dia 8 di januari.

E presidente di e Union, David Muñoz Hernández, a informa na comienso di november cu nan lo no reanuda e welga indefini cu a cuminsa dia 30 di october, y cu a keda “suspendi te proximo aviso” dia 1 di november, despues di a yega na un acuerdo cu e universidad administracion en relacion cu e plan medico di e trahadonan.

Durante e welga, e Sindicato a denuncia incumplimento di parti di e administracion central cu e acuerdo- y stipulacionnan economico acorda na september, incluyendo un pago di un solo biaha di \$3,500 cu lo ser haci na december 2024. E Sindicato di Trahadonan di UPR, fundado na 1939, ta proteha mil empleado di limpieza y mantenimiento.

No tabata posibel pa obtene un declaracion di Muñoz dia-



domingo pa determina e discrepancia entre e \$3.500 reclama pa e Sindicato y e \$3.000 autorisa pa e Hunta.

Pa financia parcialmente e pago proponi, UPR a pidi pa realoca \$2,069,769 for di e articulo di liña “Salarionan di Facultad” pa e articulo di liña “Pago Special No-Recurente (No-Facultad)” den e presupuesto certifica di UPR pa año fiscal 2025. Especifica-

mente, e parti di e presupuesto certifica di UPR pa año fiscal 2025. Fondonan a ser usa pa un prome pago di \$2.000 cu a ser paga dia 15 di januari, segun contenido di e carta.

Sinembargo, e restante porcion di \$1,000 di e pago proponi lo ser financia “for di presupuestonan certifica den futuro.” “Di acuerdo cu esaki, UPR mester zorg pa presupuestonan certifica den fu-

turo incorpora tur gasto relaciona cu e porcion di \$1,000,” e carta ta bisa.

E di dos pago, pa un suma total di \$1,034,885, lo ser paga dia 15 di juli 2025. Den sosten di e peticion pa redistribucion di fondonan, UPR a presenta un analisis di e salario proyecta y gastonan relaciona pa año fiscal 2025, y un lista di miembronan activo te cu 30 di september 2024.

Republica Dominicana: Ministerio di Hubentud ta trece “Juventud con B de Barrio” na Las Palmas de Herrera

(DiarioLibre) - Ministerio di Hubentud a tene e di cinco dia di inclusion social “Juventud con B de Barrio” den e sector di Las Palmas de Herrera, situa na Santo Domingo Oeste di e provincia di Santo Domingo, cu a conta cu sosten y presencia di e minister di Interior y Polis, Faride Raful.



Segun un comunicado di prensa, e iniciativa aki ta busca pa impacta hobennan positivamente pa medio di acceso na servicio den educacion, empleo, salud, entrepreneurship y bienestar, promoviendo nan inclusion social y fortalece e vinculo di comunidad.

Inaugurando e evento, minister Carlos Valdez a bisa cu “e vision di ‘Juventud con B de Barrio’ ta pa bolbe na e origen, na lo basico: bolbe na e medio ambiente, fortalece e famia y reconecta cu e barrio. Ta den e barrio ta nifica descubri talento y core tras di e soñonan di asina tanto hoben. Nos ta aki pa implementa politicanan cu ta re-

sponde na e necesidadnan di nos hubentud. Nos kier ta e brug cu ta conecta hobennan cu e oportunidadnan necesario pa desaroya nan talentonan y traha un destino. yen di oportunidad.”

E minister di Interior y Polis, Faride Raful, a declara cu su “compromiso ta pa trece oportunidadnan na tur skina di Republica Dominicana, specialmente na nos comunidanan mas necesidad, cu programanan manera esaki, nos ta traha pa e hobennan por traha un caminda pa exito” y ta agentenan di cambio den nos sociedad.”

Durante dia, e hobennan a participa den actividadnan

dirigi riba nan desaroyo integral, manera charlanan educativo, guia profesional y competencianan deportivo den disciplinanan manera, volleyball, ahedrez, domino y basketball.

E evento na Las Palmas de Herrera ta parti di un programa cu a beneficia mas di 13,500 hoben den barionan manera Camboya, na Barahona; Katanga, na Los Minas; Capotillo, na Santo Domingo; y Bella Vista, na Haina.

Na e ocasion aki a scoge Las Palmas de Herrera debi na e retonan cu e comunidad aki ta confronta, siendo un di esunnan mas afecta pa criminalidad na Santo Domingo

Oeste.

E programa “Juventud con B de Barrio” ta busca pa ofrece hobennan herment- y oportunidadnan cu ta permiti nan crece den un ambiente sigur, basa riba balornan di paa, convivencia y desaroyo di comunidad.

E evento a ser sostene pa mas cu 20 institucion publico y priva, incluyendo Comedores Economicos, Gabinete Social, Salud Pública, Prop-keep, Infotep, y e Scol Profesional di Forsanan Arma, cu a ofrece servicio esencial den salubridad, educacion y guia profesional.

E evento a conta cu presencia di e vice ministernan di Ministerio di Hubentud,

kendenan hunto cu minister Valdez tabata atento na e preocupacionnan di e hobennan y a participa activamente den e diferente actividadnan. Vicente Luis de Peña Peralta, vice minister di Tecnica y Planificacion; Eloísa Luna, vice minister di Administracion y Finanzas; Anyelo Ramírez, vice minister di Extension Regional; Francisco Santiago, vice minister di Supervision y Ehecucion di Programa; Endry González, vice minister di Politica Publico; y Fernando Lagares, vice minister di Entrepreneurship.

Tambe, Edwin Eusebio Félix Brito, vice minister di Seguridad Interno di Ministerio di Interior y Polis; Scarlet Benzá, minister suplente di Entrepreneurship di MAP; e diputado, Indhira de Jesús; e consehero di Santo Domingo Oeste, José Radhamés; Pastor Leonardo Piña; entre otro.

E evento a termina cu entrega di premio na e ganadonan di e competencianan deportivo y un gradicimento na tur asistente, colaboradornan y instancianan participante.

Canal di television Hapones ta habri investigacion independiente tocante mal conducta sexual di parti di e anfitrión celebridad

(AP) - E hefe di Hapon su canal di television Fuji Television a anuncia plan riba diabierna pa un investigacion independiente tocante acusacion di mal conducta sexual contra un di e pais su celebridadnan top y e compania su oficialnan cu ta sospecha di ta involucra.

Masahiro Nakai, ex miembro di e banda SMAP awo ta un anfitrión di television popular na e canal, a keda conecta pa rapportnan di media local na acusacionnan di agresion sexual na un fiesta cu un empleado di Fuji TV a aregla.

E problema aki tin un efecto negativo riba e compania di television su prijs y a causa cu un di e shareholder mas grandi a skirbi un carta expresando preocupacion tocante su gobernacion corporativo. Fuji TV su presidente Koichi Minato riba diabierna a pidi despena pa “causa problema tremendo y preocupacion cu e rapportnan den media” y a bisa cu un panel externo lo investiga e accionnan di e oficialnan di e compania, incluyendo su persona.

E scandal aki a surgi for di rapportnan cu a cuminsa den



december di Shukan Bunshun su revista semanal tocante un acuerdo di 580,000 dollar cu un muhe en conexion cu e mal conducta sexual na un fiesta aña pasa.

Nakai a admiti den su declaracion di dia 9 di januari riba su website oficial cu el a yega un acuerdo cu un muhe tocante un “problema.” El a nenga usa violencia ni tampoco cu otro persona a hunga un rol, bisando cu el a responde di manera sincero na e muhe su peticionnan den e

acuerdo.

E anuncio di un investigacion formal ta bini despues cu Rising Sun Management, cual ta un afiliado di Merca su firma di maneho di inversion Dalton Investments - cual parcialmente ta doño di Fuji TV - a critica e canal su falta di transparencia y a exige un investigacion di parti di un tercer partido.

“E controversia crea pa Mr. Masahiro Nakai ... ta reflecciona no solamente un problema den e industria di entretenimiento



generalmente, sinembargo, específicamente, e ta expone fayonan serio den e gobernacion corporativo.” Rising Sun a bisa den un carta habri na e directiva di Fuji dia 14 di januari.

“E falta di consistencia y, importantemente, transparencia den ambos reporta e hechonan y e fayonan inaceptabel den bo respuesta ta merece condena serio cu no solamente ta afecta e confianza di e audiencia, pero tambe ta afecta e valor di shareholder. Como un di e shareholder-

ernan mas grandi, controlando mas di 7% di e compania, nos ta indigna.”

Nakai tabata lider di e banda SMAP, un grupo di 5 miembro cu a debuta den 1998 y rapidamente a ricibi fama na Hapon y Asia te ora cu e banda a separa den 2016.

Canalnan di television grandi Hapones a suspende programanan unda e ta participa of a saca su persona di e grabacionnan despues di e acusacionnan cu a surgi den su contra.

Sting, Lady Gaga, Billie Eilish y Red Hot Chili Peppers ta bay toca na concierto di beneficio FireAid

(AP) — Sting, Billie Eilish, Lady Gaga, y Red Hot Chili Peppers ta entre e actonan cu ta bay subi escenario na FireAid, un concierto pa alivio di candela forestal den area di Los Angeles.

Anuncia siman pasa, FireAid originalmente tabata programa pa tuma lugar na e Inuit Dome na Inglewood, California. Awo e ta bay tuma lugar na dos diferente sitio: Inuit Dome y e Kia Forum cercano, riba dia 30 januari.

Segun un comunicado di prensa, contribucionnan na FireAid ta bay ta “distribui bao consejo di Fundacion Annenberg, pa esfuersonan di alivio a corto plaso y iniciativanan a largo plaso pa preveni desaster di candela den futuro... Tur ganashi di e concierto di beneficio FireAid na Inuit Dome y Kia Forum ta bay directamente



na e beneficiarionan designa di e evento.”

Entre e participantenan tambe ta inclui Joni Mitchell, Katy Perry, Lil Baby, Pink, Rod Stewart, Gwen Stefani, Green Day, Jelly Roll, Gracie Abrams, Stephen Stills, Stevie Nicks, Tate McRae and Earth, Wind & Fire.



Dave Matthews and John Mayer ta bay haci un presentacion en bibe pa prome biha.

Diadomingo anochi, a keda anuncia cu Olivia Rodrigo, Peso Pluma, Alanis Morissette, Anderson .Paak, Dawes, Graham Nash, John Fogerty, Stevie Wonder y the Black Crowes tambe a join e



gruponan cu ta bay presenta pa e anochi di recaudamento di fondo pa e candelanan forestal na California.

E evento ta produci pa Shelli, Irving y famia Azoff cu Live Nation y AEG Presents.

Desde inicio di e candela, celebridad y organisacionnan di entretenimento a priminti

miyones di dollar pa yuda esnan cu a keda desplasa of a perde nan hogar, incluyendo un contribucion di \$2.5 milyon di Beyonce pa un Fondo di Alivio di Candela LA recien lansa, crea pa su fundacion caritativo, BeyGOOD.


Siman pasa, e Academia di Grabacion y MusiCares a lansa e Esfuerzo pa Alivio di Candela Los Angeles cu un donacion di \$1 milyon. Danki na contribucionnan adicional, nan a distribui dos milyon dollar den ayudo di emergencia caba.

E di 67 Premio Grammy anual ainda ta programa pa tuma lugar diadomingo, 2 di februari na e Crypto.com Arena na Los Angeles, maske e Academia di Grabacion a cambia e enfoko di e evento pa sostene esfuersonan di alivio despues di e candela forestal devastador den area di Los Angeles.

Kico Melania Trump a bisti pa e inauguracion di su casa—incluyendo su sombre

(AP)—Mientras cu e pechi cora a bira sinonimo cu presidente Mericano Donald Trump, prome dama Melania Trump a haci su mesun declaracion di moda relata na sombrereria, bistiendo un sombre blauw scur pa un diseñador Mericano riba dia di inauguracion di e presidente nobo na Merca.

E sombre diseñá pa Eric Javits a proteha e wowonan di e prome dama mientras su casa a ser hura ayera pa un segundo bes. Javits a bisa cu pa bisti e prome dama tabata un di e honornan mas grandi di su carera. “Mi experiencia den arte a duna mi empuhe pa trece harmonia y balansa na e cara por medio di crea forman di sombre cu lo complementa tur tipo di cara,” el a bisa den un declaracion. “Den e caso specifico aki, esaki no tabata difcil pa logra,



pasobra Sra. Trump ta benedicon a cu un bon estructura di weso den cara, beyesa y un sentido di estilo tremendo.”

E sombre a laga su marca durante e ceremonia di inauguracion: Mientras Trump a bay pa duna su casa un sunchi despues di drenta e Rotunda di e Capitol, e sombre

a solamente permiti un sunchi di leu. hasta ex-presidente Joe Biden mester a nabega e sombre pa papia cu su casa e otro banda.

Trump, papiando den e Emancipation Hall despues di e ceremonia di huramento, a haci chansa cu e sombre di su casa a hera bula bay. E prome dama a gara su sombre mientras e helicopter militar a lanta, generando bientonan fuerte. “Casi el a bula bay,” Trump a bisa cu un risa. “E tabata lantando for di suela.”

Den un salida for di e bisti di cashmere blauw cla y handschoen di Ralph Lauren na 2017, e biahá aki, Melania a bisti un jas di wol color navy y un saya navy y un blusa di seda abao, tur diseñá pa e Mericano Adam Lippes. “E

tradicion di e inauguracion presidencial ta representa e beyesa di democracia Mericano y awe nos tin e honor di bisti nos prome dama, Sra. Melania Trump,” Lippes a bisa den un declaracion. “E trahe di Sra. Trump a ser crea pa e artesanonan mas talentoso y mi ta hopi orguyoso pa mustra e piesa aki.”

Su prome trahe di inauguracion a trece cune comparacion na e estilo di Jacqueline Kennedy. Kennedy tambe tabata famoso pa e sombre ‘pillbox’ cu el a bisti pa e inauguracion na 1961. Pero pa bisti e prome dama a bira un contencion politico na 2017, cu algun diseñadornan bisando cu nan no lo bisti e prome dama binidero—tipicamente un oportunidad unico. Algun usuario riba red social a pusha pa boicotia Ralph Lauren e tempo ey.

Awendia, Ralph Lauren tabata e diseñador pa e prome dama saliente Jill Biden, ken a scoge e diseñador aki pa su trahe di salida. El a bisti un trahe color biña monocromatico, di su jas pa sapato y handschoen, pa marca e transicion di poder.



Letranan preliminar di “Mr. Tambourine Man” di Bob Dylan bendi pa 508 mil dollar na subasta

(AP)—Letranan preliminar di e cancion di Bob Dylan “Mr. Tambourine Man” a ser bendi pa mas cu mita miyon dollar durante un benta di decenas di obheto relaciona na e cantante Mericano iconico.


Aproximadamente 60 obheto di Dylan—incluyendo potretnan, muziekblad, su guitarra, pinturanan cu potlood y un pintura compone pa e ganador di Nobel Prize pa literatura—a ser bendi diasabra na Nashville, Tennessee, via Julien’s Auctions.

E obhetonan a genera casi 1.5 miyon dollar den benta en general via oferta den persona y online, e subastador a bisa. Julien’s a bisa cu 50 di e obhetonan, incluyendo e le-



tranan cu a ricibi e prijs mas halto, a bin for di e coleccion personal di difunto reportero di musica, Al Aronowitz.

E lettranan getypt, cual a cubri tres version preliminar di e cancion, a ser skirbi riba dos muziekblad, cu anota-



cion di Dylan riba e di tres version. Dylan a skirbi e lettranan original den e hogar di e reportero, segun Julien’s, citando un articulo di 1973 pa Aronowitz.

Dylan a sinta “cu un typewriter portable riba mes ron-

dona cu huma di sigaria, su dedenan fini bezig ta type e palabranan” riba papel di copia, Aronowitz a skirbi. E tercer version, apesar di ta similar na e version final, ainda tabatin varios modificacion, e subastador a bisa riba su website.

E cancion a aparece como e cancion principal riba e banda acustico di su album “Bringing It All Back Home” di 1965 y tabata e prome composicion di Dylan pa yega 1 number na Merca y Reino Uni, Julien’s a bisa.

Otro obhetonan cu a bende halto diasabra ta inclui un pintura firma pa Dylan pa 260,000 dollar y un guitarra unico di Fender di 1983 cu a ser bendi pa 225,000 dollar. Dylan, awor 83 aña di edad, ta hayando atencion cu e estreno di e pelicula “A Complete Unknown,” cual ta enfoca riba su caminda pa celebridad durante e añanan 1960. Dylan ta ser hunga pa Timothée Chalamet, ken a traha pa varios aña pa perfecta e rol, cual ta involvi cantamento y tocamento di guitarra.

Un inicio fuerte pa atletanan Junior rumbo pa Asuncion 2025

Kaj y Zara Rozeboom ta clasifica pa Weganan Panamericano Junior

Diadomingo atardi a drenta e bon noticia cu nos atletanan Junior di “Olympic Windsurfing” Kaj & Zara Rozeboom a logra un tremendo resultado na Cancun, Mexico unda nan a participa den e evento “Mayan Wind Fest” unda ambos a logra di termina den e top 3.

Aun mas importante cu esaki, ta cu e meta principal a ser logra, clasifica pa e Weganan Panamericano Junior cu lo tuma luga na Asuncion, Paraguay den luna di augustus binidero. Atletanan Kaj & Zara Rozeboom ta continua awo cu nan entrenamiento cu meta final di haci un bon prestacion na e Weganan di Asuncion 2025.



Champions League ta haci debut den januari cu un partido entre PSG y Man City

(AP)—E prome weganan di e **Champions League** pa tuma luga e luna aki ta inclui un partido cu consecucionan posiblemente sorprendente den un debut di temporada impredecible torneo.

Paris Saint-Germain vs. Manchester City diaranson ta un bataya entre e equiponan tradicionalmente fuerte pero cu actualmente ta riba 25 y 22 luga den e ranking. Si e finalista di 2020 (PSG) y e ganador di Champions League na 2023 (Man City) hunga un wega na Parc des Princes, ambos por cuminsa e ronda final dia 29 di januari pafo di e 24 puesto mas halto cu ta cualifica pa e etapa di eliminacion.

E formato nobo cu a reemplasa e gruponan tradicional—awor cu ocho wega en bes di seis, enfrentando ocho diferente oponente, y dos den januari—ta teritorio desconoci hasta pa e UEFA, di ken su pronosticonan pre-

temporada cu ocho punto mester garantisa avance probablemente no lo ta completamente corecto. Sinembargo, no hopi a imagina kico lo sucede den e prome seis ronda.

Man city y PSG a experencia un tempo dificil recientemente, Real Madrid a perde mita di su weganan riba di 20 luga apesar di agrega Kylian Mbappé den e equipo, y debutante mas abao Brest a logra cuatro victoria y ta para na di siete luga den e ranking, net riba Lille.

“E lo tabata imposible pa lista e ocho club aki como e mihonan,” segun Giorgio Marchetti, secretario general suplente di UEFA, a conta The Associated Press den un entrevista recien. “Tin un brisa nobo.”

“Mi ta kere e formato tin un impacto,” Marchetti a continua, refiriendo na comentarionan pa entrenador di Inter Milan, Simone Inzaghi, cu ta

mas dificil pa prepara pa ocho diferente oponente en bes di tres. “E ta un reto mas grandi.”

Pa cual posicion e equiponan ta hungando?

E top ocho den e ranking dia 29 di januari ta avansa directamente na e ronda di 16 cu ta cuminsa den maart. Esey lo probablemente inclui lider actual Liverpool y Barcelona cu ta e unico dos equipo cu ya ta sigur di caba den e top 24. Liverpool ta e unico equipo pa gana tur seis wega.

Equiponan riba posicion 9-24 lo bao den un ronda nobo di eliminacion. Equiponan 9-16 lo ta confirma den e secuencia dia 31 di januari y lo hunga e segundo etapa na cas. Equiponan riba 17-24 luga ta anfitriona e prome etapanan.

Equiponan 25-36 den ranking lo ser elimina y no ta ser transferi na e Europa League. Equiponan ya elimina ta inclui Leipzig, Slovan Bratislava y Young Boys cu cada un perdi den tur seis wega.

Partidonan di awe

Liverpool ta anfitriona Lille y Barcelona ta hunga contra Benfica (15). Atletico Madrid (11) por derota bishitante Bayer Leverkusen (4), cual tin un solo punto mas.

Aston Villa, e ganador di Copa Europeo na 1982, por cualifica pa e ronda di 16 cu un gana contra Moccasin (16). Stuttgart (26), ta e favorito den e partido contra Slovan y ta move pa dies punto, cual lo pone presion riba PSG y Man City.

Weganan di diaranson

Real Madrid ta anfitriona Salzburg, y Arsenal (3) por sigura su ronda di



16—y haci Man City e favor—di gana na cas contra Dinamo Zagreb (24). Inter Milan (6) lo hunga contra Sparta Prague, y Bayern Munich (10 cu 12 punto) lo biaha pa Feyenoord (18).

Brest ta hunga contra Shaktar Donetsk (4) na Alemania. Shaktar Donetsk lo probablemente mester gana pa por sigui den e competencia.

Pakico e Champions League ta tumando luga na januari Pa placa, mas tanto. E clubnan mas influencial kier un torneo mas grandi y lucrativo y e haya dos extra wega memey siman pa tur. E calendario druk pa futbol no a laga hopi espacio habri.

Historicamente, competencianan di clubnan Europeo ta tuma un break memey winter te cu maart. Despues februari tabata ocupa na 2001 pa e Champions League ora un formato nobo cu un segunda etapa di grupo a cuminsa. Februari a keda riba e programa ora e ronda di 16 a cuminsa na 2004, y pa e proximo dos decada.

Pues ora UEFA a dicidi na 2022 riba e fase di ocho wega pa e liga aki, tabatin mester di januari aunke algun liga den paisnan Nordico no ta cuminsa te apenas maart, y otronan ainda ta den break.



Un medaya di oro di Olimpiada di 1904 na St. Louis ta bende pa 545,371 dollar na subasta

(AP) - Un medaya di oro otorga na e prome Olimpiada organisa riba tera Mericano a ser bendi na un subasta mas di mita miyon dollar, parti di centenaes di memorabilia for di e Olimpiadanan durante e decadanan, un firma a anuncia diabierna.

E medaya di 1904 di St. Louis, subasta pa 545,371 dollar, tin "Olympiada, 1904" skirbi y ta demostra un atleta victorioso dilanti. Di e otro banda, Nike, e diosa di victoria den mitologia Griego, por ser mira banda di Zeus, e rey di tur dios, y e palabranan pa e careda pa cual esaki a keda otorga. E medaya, cual a ser otorga na Mericano Fred Schule, ta inclui e pakete original.

Esaki tabata e prome Olimpiada den cual medayanan di oro a ser otorga y e Mericanonan a probecha di esaki, ganando 78 di e 96 evento. Na diferencia di medayanan Olimpico awendia cual ta mas tanto traha di silver cu cobertura di oro, esakinan tabata mas chikito y traha completamente di oro.

Bobby Eaton, un especialista Olimpico na RR Auction a bisa cu ta poco usual pa e tipo aki presenta den un subasta aunke esun aki en particular a bini for di e famia Schule su coleccion. "Ningun hende sa



exactamente cuanto medaya di oro di 1904 tin eyfo," Eaton a bisa. "Loke si nos sa ta cu nan ta cada biaha menos comun. Di e alrededor di 100 medaya cu a ser otorga na St. Louis, varios a ser perdi of warda den coleccionnan priva y museonan."

Mas aleu cu e medayanan si, e Olimpiada di 1904 tambe ta recorda pa varios controversia.

E Olimpiada originalmente a ser otorga na Chicago, sinembargo e organisadornan di World's Fair na St. Louis tabatin miedo di e competencia pa audiencia y a manifesta contra un di dos evento internacional organisa na mesun tempo. E organisadornan di World's Fair a menasa di anfitrióna nan propio evento atletico. El a tuma e funda-

dor di movimiento Olimpico moderno, Pierre de Coubertin, pa crea pas pa medio di hiba e Olimpiada 483 kilometer zuid.

Si e drama aki no tabata suficiente, tambe Fred Lorz a gana e maraton te ora cu a descubri cu el a core parcialmente den un auto.

Organisadornan a toca "Anthrology Days," ora cu miembronan di tribunan Indigena di otro partinan di mundo hiba pa Louisiana Purchase Exposition, e ex number di St. Louis World's Fair, a ser saca for di e feria y bisa pa competi sin ningun tipo di advertencia.

E Olimpiada tambe a mira e debut di boxeo y freestyle wrestling, deprotenan cu a keda den Summer Olympics te cu dia di awe," Eaton a comparti. "Pa tin un manera esaki, den condicion asina excepcional, ta berdaderamente remarcabel y un oportunidad unico pa coleccionistanan."

E benta ta parti di centenares di articulonan Olimpico cu a ser bendi na e subasta, incluyendo un medaya di brons for di Paris Olympics 2024 ademas di medayanan di oro di 1932 Los Angeles Olympics, 1964 Tokyo Olympics, 1998 Nagano Olympics y 2012 London Olympics. Memorabilia Olimpico for di



basta tempo tin un prijs bastante halto.

Den aña 2022, e medaya di silver di Luz Long, e atleta Aleman cu a forma un amistad cu Jesse Owens na e Olimpiada di 1936 na Berlin, a bende na un subasta pa mas di 488,000 dollar. Un medaya di silver di prome luga a ser otorga na e prome Modern Olympic Games na Athens den 1896 y a bende 180,111 ora cu el a ser subasta den 2021 y un medaya di oro di 2010 Winter Olympics na Vancouver a bende pa 68,750 den 2019.

Atletanan tambe a subasta

nan medayanan pa caridad, incluyendo e campeon di canoa di 2 biaha Yuri Cheban di Ucrania ken su dos medayanan di brons y oro a ser subasta den 2022 pa 109,451 pa yuda e guerra. Landado Ryan Lochte a subasta su 6 medaya di silver y brons e mesun aña, cu e 166,779 dollar recauda bayendo na un organisacion dedica pa muchanan. El a keda cu su medayanan di oro.

E proximo Olympiada lo ta na Los Angeles den 2028, marcando e tercer biaha cu e ciudad ta organisa e Olimpiada. Tambe el a organisa esaki den 1932 y 1984.

World Anti-doping Agency no lo apela veredicto den caso di droga di Iga Swiatek

(AP) - World Anti-doping Agency no lo apela Iga Swiatek su suspension di un luna pa motibo cu el a faya un test di droga pa motibo cu su splicacion ta "posibel," WADA a anuncia dialuna.

WADA a publica su decision despues di minuutnan cu Swiatek, ganadora di 5 Grand Slam y ex hungado di tennis femenino number 1, a logra un victoria di 6-0, 6-1 contra Eva Lys pa yega cuarto di final den Australian Open.

"Wel, sigur mi ta contento cu mi por cera e caso aki," Swiatek a bisa, "awo mi por djis sigui dilanti y caba cu henter e proceso aki, paso mi kier hunga tennis y enfoca riba e torneo."

Diferente di e caso di Swi-



atek, WADA a apela e exoneration di e hungado den posicion number 1 di hende

homer actual Jannik Sinner y un audiencia ta den plan na Court of Arbitration for

Sport (CAS) na Laussane, Switzerland den april.

Sinner no a ricibi un suspension pa motibo cu International Tennis Integrity Agency (ITIA) a determina cu e no tabata negligente pa dos test positivo pa steroid anabolico den maart.

E resolucion di Swiatek su caso a ser publica pa ITIA den fin di november. Ya caba el a keda poni un banda provisionalmente, perdiendo 3 torneo den october y a caba su suspension durante e deporte su 'offseason'.

"WADA a busca conseho di conseho legal externo, ken a considera cu e atleta su splicacion pa contaminacion tabatin suficiente evidencia, cu ITIA su decision tabata cumpli cu World Anti-Dop-

ing Code, y cu no tabatin motibo rasonabel pa apela esaki na CAS," dialuna su declaracion di WADA a informa.

Swiatek a acepta un suspension di 1 luna despues di a test positivo pa e substancia prohibi di trimetazidine, un medicamento pa curason conoci como TMZ.

Swiatek a faya un test fuera di competencia den augustus y ITIA a acepta su splicacion cu e resultado no tabata intencional, y causa pa e contaminacion di e medicamento melatonin cu e tabata bebendo pa su problemanan di jetlag y cu drumimento.

ITIA a bisa cu el a determina cu su nivel di culpa tabata "na e banda mas abao pa motibo cu no tin culpa significante ni tampoco negligencia."

Cientificonan cu discapacidad ta haciendo laboratorionan di investigacion y trabao riba veld mas accesibel

(AP) - E caminda pa Lost Lake ta uno sin asfalt y sumamente halto, yena di buraco y piedranan skerpi. Un grupo di científiconan y studiantenan tabata subi cu ayudo pa guianan. Pa esnan cu no por a cana e ruta, un drone a trece e lago den bista pa nan.

E trip a ser diseña pa ilustra e desafionan cu investigadornan cu discapacidad hopi bi-aha ta enfrenta y con e bareranan por ser combati.

“Djis paso bo no por hacie manera otro hende no kiermen cu bo no por,” Anita Marshall, un geologo di University of Florida a bisa. E grupo a inclui científiconan cu problemanan di bista, ho-rea y movilidad.

E organisacion di Marshall a organisa e trip na e lago cerca di San Andreas Fault, pafo di San Bernadino. Su grupo - International Association for Geoscience Diversity - y otronan ta trahando pa mehora e acceso na trabao di laboratorio y riba caya pa esnan cu discapacidad sinti bon bini y keda.

Taormina Lepore, un palentologo di Michigan University cu a participa, a bisa cu e científiconan tin e habito di duna balor na un solo manera tradicional di haci un trabao. Na Lost Lake, tur hende por a mira - hasta si nan por a yega físicamente. “E ta trata empatia, mesun hopi cu ciencia,” Lepore a comenta, ken tambe ta investiga ciencia den educacion.

Haci laboratorionan mas accesibel

Personanan cu discapacidad ta 3 por ciento di e forsa laboral den matematica, ingenieria, tecnologia y ciencia segun data di 2021 di National Science Foundation.

Científiconan cu discapacidad ta bisa cu esaki ta parcialmente pa motibo cu laboratorionan, klasnan y sitionan di trabao no ta diseña pa acomoda nan. Studiantenan y facultad te ainda ta bisa cu nan no por traha den un laboratorio of conduci nan investigacion di manera safe, segun Mark Leddy, ken anteriormente a maneha subsidio relaciona cu discapacidad pa National Science Foundation a comparti.

Americans with Disabilities



Act, aproba den 1990, ta pone un minimo di regulacionnan pa edificionan nobo y laboratorionan, incluyendo rampa y camindanan accesibel pa rolstoel.

Sinembargo modifica e laboratorionan mas bieu ta un proceso largo y complica.

Alyssa Paparella ta trahando riba su doctorado den biologia na Baylor College of Medicina y a funda un comunidad online pa científiconan cu discapacidad. El a bisa cu un edificio di ciencia na un di su ex scolnan no tabatin boton automatico pa habri portanan. “Kico esey ta bisa di ken bo kier pa traha den e laboratorionan?” el a remarca. “Esey ta e porta principal cu nan no por nisikiera usa pa dreña.”

Leddy a bisa cu investigadornan cu discapacidad no por ser balora a causa di nan experiencianan den bida. Constantemente mester bin cu ideanan creativo pa por logra combati y surpasa e bareranan den nan bida, un habilidad di solucion problema cu ta indispensable den un laboratorio.

“Si nan no ta sinti bon bini, si nan no tin acceso, con nan por contribui e talento aki?” Leddy a declara.

Na Purdue University na Indiana, profesor di ingenieria Brad Duerstock a yuda diseña un laboratorio biomedico añanan atras cu sosten di e scol y un instituto nacional di salud su subsidio, kitando cabinet for di bao di e sink y otro partinan pa asina e rolstoel por facilmente haci uso di esaki.

E gasto di haci un laboratorio mas accesibel ta varia segun con extenso e cambionan mester ta, segun Duerstock. Algun scol ta aloca fondo pa

e mehoracionnan y organisacionnan di ciencia por ofrece subsidio pa esaki.

Accesibilidad riba caya

Riba e trip di California, e grupo a explora e lago cu a surgi na San Andreas Fault, unda e choke di dos ‘aardplaten por causa teremoto.

E grupo a inclui fanaticonan di piedranan den tur diferente etapa di e carera. Un cantidad di nan tabata estudiante. Otronan tabata profesor, emociona pa explora e area den un grupo unda nan por confia cu lo cuida di otro.

Central Connecticut State University su profesor Jennifer Piatek, ken ta usa rolstoel, a mira e lago via imagennan di drone y a usa un lens pa examina e piedranan cu otro participantenan tabata trece p’e.

El a bisa cu tabata algo bunita pa forma parti di un comunidad cu a anticipa su necesidadnan. Por ehempel, nan bus a parkeer na un area mas plat pa asina ta mas facil pa e por baha. Bo por siña di imagennan y mapanan, “pero bo tin cu realmente ta den e espacio pa bo por sa mas,” Piatek a bisa, ken ta studia geologia di planetanan.

Lepore, un persona cu tin poco vision, a scan e piedranan usando un aplicacion di inteligencia artificial cu tabata describi e colo y forma di e piedra cu bos halto.

“Naturalesa no ta automaticamente accesibel,” el a comparti. “Naturalesa n otin rampa y e tipo di cosnan cu nos ta desea pa e tin. Pero tin maneranan pa traha cu esaki y maneranan cu nos como geocientifico por haci cosnan berdaderamente accesibel.”

Bushra Hussaini ta usa tip di e tripanan aki pa brinda sosten



na stragiaire of boluntariano incapacita na New York American Museum of Natural History unda e ta traha. El a bisa cu e comunidad di geologonan aki ta loke ta mantene ta keda bin back. “Nos ta siña di otro y nos ta yuda otro,” el a splica.

Prome cu el a sali, Marshall a urgi e participantenan pa duna un man of un schouder pa depende di dje si ta necesario. Su persona y otronan di e organisacion tin tempo ta bay riba trip tur aña como un parti di Geological Society of

America su reunion anual. Como estudiante den su doctorado, Marshall tabata bay trip solamente pa warda den e van, frustra, pa motibo cu e organisadornan no a pensa con pa acomoda su discapacidadnan. E kier pa cosnan ta diferente pa e siguiente generacion di científico.

“Henter punto di e tripanan aki ta pa planta e simia,” Marshall a expresa, agregando cu “tin otro maneranan pa cana y avansa.”

Bomberonan a bay Camacuri pa yuda pone un pashent den ambulans

Diadomingo mey anochi a drenta informe di cu un persona a bira malo na un apartamento na Camacuri, mesora a dirigi ambulans na e sitio.

Na yegada di e ambulans a bin compronde cu aki ta trata di un pashent cual mester di bombero pa yuda pone e persona den e ambulans. Na yegada di bombero cu nan ayudo a logra saca e pashent y



pone den ambulans pa asina por hib'e pa hospital.

Celular a cay den lama y mucha muhe di 13 aña cu a bula bay su tras a guli hopi awa

Diadomingo atardi a drenta informe di cu un mucha muhe di 13 aña a bula bay den lama ora un celular a cay den lama y lo a guli hopi awa, mesora a dirigi un ambulans y polis na e sitio.

Na yegada di e patruya a nan a bin compronde cu e mucha a bula den awa na momento cu e celular a cay den lama. E mucha muhe lo a guli hopi awa te ora nan a rescate. Na yegada di e ambulans nan a



yuda e mucha pero como el a guli hopi awa ambulans a transport'e pa hospital pa asina nan tene na observacion.

Cacho a morde un mucha muhe na Piedra Plat



Diasabra atardi a drenta informe di cu un cacho a morde un mucha na Piedra Plat, mesora a dirigi tanto polis como ambulans na e sitio.

Na yegada di e patruya a bin compronde cu e cacho a

morde e mucha te cu esaki mester intervencion medico. Na yegada di e ambulans nan a atende e mucha y a transport'e pa hospital unda eynan lo a trat'e y lo dun'e un inyeccion anti-tetanus pa evita contagio di e cacho.

Un homber a kibra un boter den cara di un otro persona

Diadomingo madruga a drenta informe di un caso di maltrato cu hende herida na e hotzone banda di hotelnan highrise, mesora a dirigi polis cu ambulans

na e sitio.

Na yegada di e patruya a bin compronde cu aki ta trata di un caso unda cu un persona lo a kibra un boter den cara di

otro persona, pero ya caba e victima a bay cu algun amigo pa hospital. E agresor tambe a bandona e sitio y nan a cancela e ambulans.



Cuerpo di bombero a bay yuda ambulans baha un hende cu a bira malo den casino




Diasabra anochi a drenta informe di cu un persona a bira malo den un casino

na Oranjestad, mesora a dirigi ambulans na e sitio.

Na yegada di e ambulans nan a atende cu e persona pero ya cu mester baha e persona for

di un trapi halto a rekeri presencia di bombero na e sitio. Na yegada di e bomberonan

nan a yuda e personal di e ambulans pa baha e persona cu a bira malo.



Auto a bolter huma y stroba trafico na Tanki Flip

Diadomingo adrenta informe di cu un auto ta sacando huma na granel riba e caminda di Tanki Flip pa Hato, mesora a dirigi tanto polis como bombero na e sitio.

Na yegada di e bomberonan

ya e pick-up no tabata saca huma mas nan a core bay te Hato y Pos Abao y no a haya ningun otro auto mas y a bolbe bin pariba hunto cu polis y a bin compronde cu ta e pick-up truck Kia cu nan a topa tabata esun cu tabata saca hopi huma. E huma tabata

masha hopi cu autonan no a tripi di sigui riba e caminda y a bira bin back na ambos banda. Como ya caba e huma a stop bomberonan a regresa na nan post na Tanki Flip y polis a sigui cu nan patruya.



Dama turista bebi a bula den lama dal su cabes na e barancanan na Tamarijn All Inclusive

Diadomingo atardi un persona a yama Centro di Alarma avisando cu tin un dama turista cu problema den lama na Tamarijn All Inclusive.

Segun e persona a reporta, el a dreña lama cu su telefon pa

asina avisa kico a pasa e dama y cu ta mihor nan manda un ambulans na e sitio. Na yegada di e ambulans a bin compronde cu e dama turista burachi a bula dreña lama y a dal su cabes na e barancanan. Mesora a atende e dama y a transport'e pa hospital.



Intoxicacion of overdose na Centro Medico a rekeri transportacion urgente pa hospital

Diadomingo atardi a laat a dreña informe di un caso di overdose unda e Dokter di Centro Medico a solicita cu urgencia un

ambulans pa bay hospital cu un pashent di intoxicacion of overdose.

Mesora a dirigi un ambu-

lans na Centro Medico. Na yegada na Centro Medico e ambulans a tuma e pashent y a bay cune direccion hospital.



Persona a perde tino despues di come algo cu a cay malo



Diadomingo atardi a dreña informe di cu ta pidi un ambulans cu urgencia pa un persona cu lo ta alergico of algo a cay malo den su stoma y a

perde tino, mesora a dirigi un ambulans na e sitio.

Na yegada di e ambulans nan a haya e persona off y a atende e persona. A bin com-

pronde cu sea e ta alergico pa algo of algo lo a cay malo den su stoma y a transport'e pa hospital cu urgencia.

Porta di hero grandi a cay riba muchanan na Esso Heights



Diadomingo atardi a dreña informe di cu un porta a cay riba 2 muchana Esso Heights, mesora a dirigi tanto polis como ambulans na e sitio.

A pidi pa 2 ambulans mirando cu ta trata di 2 muchana. Como cu a dreña un otro caso di emergencia na Centro

Medico a desvia e ambulans pa Centro Medico. Na yegada di e patruya a bin compronde cu e porta di cura grandi a bay cay riba e muchanan y a herida nan. Na yegada di e ambulans nan a mes a atende ambos muchana y a transporta nan pa hospital unda muy probablemente lo a tene nan pa observacion.

Accidente cu hende herida na e crusada
Caya Ernesto Harms cu Zoutmanstraat

Dialuna mainta a drenta informe di un accidente cu hende herida na e crusada Caya Ernesto Harms cu Zoutmanstraat, mesora a dirigi tanto polis como ambulans na e sitio.

Na yegada di e patruya a bin compronde cu aki ta trata di un accidente unda un turista biniendo den un Hyundai Accent for Caya Ernesto Harms cu no a para pa duna preferencia na e trafico cu tabata bini for di man drechi riba un caminda di preferencia y a dal esaki mand'e bay dal riba un mata mientras e Accent mes a bira 45 grado. Debi na e fuerte impacto e chauffeur di e auto Suzuki di Wit Gele Kruis a resulta herida. Na yegada di e ambulans nan a atende e victima mientras e turista no tabata desea di haya atencion medico.



Accidente na e birada di e rotonde Pos Chikito

Dialuna mainta a drenta informe di un accidente na e rotonde Pos Chikito, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda autonan a dal otro den banda unda un a haya sla banda robes dilanti y e otro banda rechts patras. Afortunadamente ningun hende a resulta herida.



Accidente pa falta di preferencia na e crusada Pampoenastraat cu Caya Juancho Kock



Dialuna mainta a drenta informe di un accidente na e crusada Pampoenastraat cu Caya Juancho Kock, mesora a dirigi un patruya na e sitio.


Na yegada di e patruya a bin compronde cu aki ta trata di un accidente pa falta di preferencia unda cu un Toyota Axio no a duna preferencia na e Hyundai Tucson y nan a dal den otro Afortunadamente ningun hende a resulta herida.

Bay wak eleccion di reina paden mientras ladron ta coba den bo auto pafo!











Dialuna madruga despues di cu eleccion di Reina a caba, doñonan di auto a sali pafo y a haya e sorpresa cu nan a kibra drenta horta den nan auto.






Almenos un chauffeur nan no a horta nada for di su auto pero si a comete destruccion na e lona di su Jeep. Pero otro victimanan si no tabata tin e suerte ey y a bira victima di kiebrot y ladronia.


Resultado Sorteo Januari 20			
Cadena Alexander Lottery ta presenta resultado di weganan di suerte			
DIARIO	KORSOU	SUPER4	FLAMINGO
7386	0675	6999	2889
6277	7214	SUPER5	5990
3809	7519	-	4617

MERDIA


Sorteo # 4513
1262
3583
9395

X2

Sorteo # 4513
6587

X2

Sorteo # 2569
6641

Sorteo # 4513
9897
Acuario

Sorteo # 1387
653

X2

ANOCHI

	
Sorteo #	Joker Letter
0 x Jackpot	Proximo Jackpot
0 x Match 4+	230.000,-
0 x Match 4	
0 x Afl. 12,00	
	07-08-12-15-27
Sorteo # 6719	Proximo Jackpot
0 x Jackpot	113.000,-
7 x Match 4	
285 x Afl 8,00	
	
Sorteo #	Mega Ball
0 x Jackpot	Proximo Jackpot
0 x match 4	650.000,-
0 x Afl. 500,00	
0 x Afl 50,00	
0 x Afl.15,00	
	Afl. 1.000.000,-
	
Sorteo #	





Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

Fundacion Autismo Aruba

Irenestraat 21 Aruba
297-588-1179

Fundacion Pa Nos Muchanan

Cumana 2 Aruba
297-583-4247

Fundacion Tel Pa Hubentud

Wilhelminastraat 19
Aruba
297-588-6138

Koningin Wilhelmina Fonds

Spinozastraat 9 Aruba
297-582-0412

Mary Joan Foundation

Sabana Blanco 8 Aruba

297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

Stichting Fundacion Guia Mi

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081



Dokter na warda

Oranjestad San Nicolas
Hospital Imsan
7:00 pm / 10:00 pm 24 ora

Botica na warda

Oranjestad: San Nicolas:
Trupiaal: Aloe:
Tel. 583 8560 Tel. 584 4606
EMERGENCIA 911

POLIS

Oranjestad 100
San Nicolas 104
Santa Cruz 105
Noord 107
Tip Line 11141
Brandweer 115
Ambulance 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

BOTICA

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
San Nicolas 584-5712
Santa Anna 586-8181
Santa Cruz 585-8028
Sero Preto 584-4833
Trupial 583-8560

UTILIDAD

Setar 117
Web 525-4600
Elmar 523-7147

FUNERARIA

Aurora 588-6699
Royal Funeral H. 586-4444
Ad Patres 584-2299
Olive Tree 584-8888

Servicio di Taxi

**Aruba Transfer Tour &
Taxi C.A.**
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba

Tel: 587-8850
Tel: 280-2828
Whatsapp: 592-7024

8 persona ta fayece den candela na cas di cuido na Serbia



(AP) - 8 persona a fayece dialuna den un candela na un cas di cuido pa personanan di edad pafo di e capital di Serbia, Belgrade, unda ta sospecha cu esaki a cuminsa a causa di un residente segun oficialnan.

7 otro a ser herida den e candela cu a surgi alrededor di 3:30 di mainta na Barajevo, un municipio cerca di Belgrade, e television di estado RTS a reporta. "Emergencia a traha rapidamente sinembargo desafortunadamente e candela a empeora y 8 persona a perde nan bida," Minister di Cuido Social di Serbia Nemanja Starovic a comenta.

Polis a bisa den un declaracion cu 30 persona tabata den e cas ora cu e candela a surgi. Nan a bisa cu e candela a tuma casi un tercer parti di e facilidad di cuido, cual ta den un cas na un area aparta.

Nan tin sospecha cu e candela a ser causa intencionalmente segun polis.

E fiscal di estado a bisa cu un investigacion te ainda ta andando sinembargo tin indicacion inicial cu ta sugeri cu un di e residentenan cu a fayece den e candela a causa esaki.

Esnan herida a ser hiba dos hospital na Belgrade, segun RTS. Por lo menos un persona tabata den condiciona serio segun dokternan.

"Esaki ta un tragedia grandi, pero e por a ta un tragedia pio," RTS a cita oficial di sector di emergencia Luka Causic.



Pronostico di tempo

Tempo:

Awe tardi y awe nochi: levemente te parcialmente nubia cu un awasero pasahero
Den marduga y mañan: parcialmente te temporalmente hopi nubia cu un awasero breve

Temperatura maximo 31
grado Celsius
Temperatura minimo 25
grado Celsius
Indice di calor (heat index) den y rond di oranan di merdia: 32 pa 36 grado Celsius
Uv index: 8

Bahada di solo : 6:36pm
Subida di solo : 7:06am

Biento:

Moderate te basta fuerte for di direccion oost te oost-noordoost; forsa 4 te 5 (20 te 39km/ora, 11 te 21 nudo)
Durante di dia fuerte te posiblemente duro den rafaga; forsa 6 te 7 (40 te 61km/ora, 22 te 33 nudo)

Situacion general di tempo:

E area di presion halto riba



Atlantico lo zorg pa un biento fuerte den region. Di otro un banda e aire transporta pa region local lo zorg pa de bes en cuando mas nubia den area. Esaki por induci algun awasero breve den region local.

Condicionnan maritimo/estado di lama:

Na partinan protege di costa: keto, rond di 1 pia.
Na partinan zuid: trankil 1 pa 3 pia.
Na partinan oost te noordwest di costa: modera te localmente poco bruto cu olanan alrededor di 4 pa 6 pia, localmente 7 te 8 pia.

Aurora

Royal Pray

Funeral Home & Crematory

"I have fought the good fight, I have finished the race, I have kept the faith." – 2 Timothy 4:7

With hearts full of gratitude and love, we announce the funeral of our beloved and devoted mother, grandmother, great-grandmother, sister, and aunt.



Elaine Margaret Rodgers

Sunrise: October 31st, 1944
Sunset: January 10th, 2025

Elaine's life was a testament to faith, love, and kindness. She touched the hearts of everyone she met, leaving behind a legacy of cherished memories. Her gentle spirit will forever remain in the hearts of those who loved her as we take comfort in knowing she is now at peace in the arms of the Lord.

On behalf of her family and friends who are left to mourn:

Parents: †Alberta and †Roland Rodgers

Children

Curven Rodgers and Joanne Geerman
Curven Junior, Xiantee, Xianeika, Ceejay and Jaycee
Giovanni Rodgers and Jasmine Ras

A nephew she nurtured with the love of a mother

Harold and Els Rodgers
Ashley, Allard, †Arwin and Roland

Brothers and Sisters

†Pearl de Graf
Astrid and †Eliane
†Harold Rodgers
George Rodgers
George (Dito) Junior, Griseldys, Darwin and Henry
Rudolf (Dolfi) and Deta Rodgers
Natasha, Ryan, Gabriel, Rashim and Dariene
Theodora Cornett
Fernando and Ferderick

Father of her sons: Henny Adamus

Friends she loved like siblings

Iris Barros, Melva Eman, †Suset Baptist

The neighbors who shared in her life's journey

Family Richardson, Family Eman, Family Cellaire, Family Granadillo, Family Barros

The colleagues she worked alongside with pride at

Oriental Restaurant, Talk of the Town Hotel, Concorde Hotel, Police Station Oranjestad

The caretakers whose care, compassion, and dedication provided her with comfort during her time of need, including -

Dr. Thuis and her staff

The nurses and doctors at Dr. Horacio Oduber Hospital
The staff and nurses at Cas di Machi Nursing Home.

The brothers and sisters of the Seventh-day Adventist Church who stood by her in faith offering their love, prayers, and unwavering support throughout her life

Elaine is related to the families

Rodgers, Geerman, Ras, Dubero, de Graf, Peterson, Cornett, Adamus, Baptist, Steward, Howard, Gumson, Zink, Moreno, Richardson, Barros, Eman, Cellaire, Granadillo, Ruiz, Luidens, Acosta, Koeiman, Meeyee, Greep, Moreira, Beddo, Romney.

The Funeral Services will take place on **Tuesday, January 21st, 2024, from 9 AM to 11 AM at Aurora Funeral Home**, and from there to the Protestant Cemetery in Oranjestad, where Elaine will be laid to rest with her beloved mother and father.

Please accept our sincere apologies if we may have forgotten to mention any other family members or friends.

Our family kindly requests your understanding and respectfully asks that no visitors come to the family home for condolences after the burial.

Aurora

Royal Pray

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Cu dolor na nos curason pero conforme cu
boluntad di Señor nos ta anuncia fayecimento di:



**Hilda Angelica
Raphaëla-Martinez**

Mihor conoci como: "Abuelita", "Mama Angela" of
"Keka"

*29-01-1929 – †16-01-2025

Na number di su

Esposo: †Agusto Raphaëla

Yiunan:

Olimpia Margarita Rivero Martinez
†Guillermina "Guilla" y †Emilio Maduro-Rivero
Guillermo y Mercedes Rivero Martinez

Nieto(a)nan:

Roberto y Belkis, Evan, Marry, Jennyfer, Lhia, Angel
y Alfredo

Bisanieto/a:

Keshia, Iverson, Nethan, Evellene, Evandra, Evanca,
Saidy, Robert, Jazhir, Kaeylon, D'Zion, Nigel y
Ivoney.

Tataranieto/a nan

Rumanan:

†Patria Martinez y famia
†Ivhanoe Vitiello Martinez y famia

Sobrinonan stima, bisiñanan di Kamay, amiga y
amigonan y demas famia na Republica Dominicana,
Merca y Hulanda cual ta hopi pa menciona.

Demas famia: Martinez, Raphaela, Rivero,
Maduro, Read, Romano, Geerman, Eduards,
Luydens, Christiaans, Lacle, Henriquez,
Hernandez, Tromp, Vallejo, Florez, Croes, Lee,
Williams, Wout, Angela, Koolman, Ramchandani,
Godet, Schwengle Karssen, Quandt, Semerel,
Hayer, Vega, Ridderstaat y Pineda.

Ta invita pa asisti na **acto di despedida** y entierro
cu lo tuma lugar **diaranson 22 januari 2025** for di
2or pa 4or di atardi na Misa Sta. Anna na Noord
despues lo sali pa santana di Noord.
Nos ta pidi disculpa si den nos tristeza nos a lubida
di menciona algún famia of amistad.

Despues di entierro no ta ricibi bishita di
condolencia na cas.

Ta pidi pa bisti colornan alegre pa entierro.

Aurora

Royal Pray

Funeral Home & Crematory

*Laga tur loke ta spera mi ta bunita
Laga tur locual cu mi encontra na caminda ta
bunita
Laga tur locual cu mi laga atras keda bunita y
Laga esakinan termina den tur buniteza.
Autor: Cado Wever.*

Cu dolor na nos curason, pero conforme cu
Señor su boluntad, nos ta participa fayecimento
di nos ser stima:



Dr. Elizabeth Lacle-Castillo

*06-11-1948 - †18-01-2025

Acto di despedida lo wordo anuncia despues

Aurora

Royal Pray

Funeral Home & Crematory

*Laga tur loke ta spera mi ta bunita
Laga tur locual cu mi encontra na caminda ta
bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.*

Nos ta anuncia fayecimento di



Yolanda Filomena Rosel

*12-08-1950 - †16-01-2025

Acto di entierro lo wordo anuncia despues.

Aurora

Royal Pray

Funeral Home & Crematory

"Dios ta amor... y amor
ta Dios, maske mi no ta
na e mundo aki, tur dia
lo mi ta banda di boso
Curazon, mi por stens di
loke Señor ta hasi"
Salmo 33



Cu dolor na nos
curason, nos ta
participa fayecimento
inesperadamente di:

John Steve van der Linden
*20-03-1968 - †02-01-2025

Acto di entierro lo wordo anuncia despues

Aurora

Royal Pray

Funeral Home & Crematory

Lagrima y flornan por seca, su recuerdonan y tur loke
el a haci y significa pa nos, lo keda graba pa semper
den nos mente y curason. "Cerca Dios mi alma ta na
paz, ta di DJ'E mi salvacion ta bin"
Salmo 62:1

A fayece inesperadamente:



Joaquin Giovanni Vrolijk
Cariñosamente yama "Ivan"
*01-08-1969 - †27-12-2024

Acto di entierro lo wordo anuncia despues

Aurora

Royal Pray

Funeral Home & Crematory

"Señor ta mi wardador, mi'n tin
falta di nada
Den cumu di yerba berde e ta
ponemi sosega.
E ta hibami na awa trankil,
Pa mi bolbe haña forza".
Salmo: 23

Nos ta anuncia fayecimento di:



Roland Raymond Tromp
Mihor conoci como: "Roly"
*04-10-1954 - †14-01-2025

Acto di entierro lo wordo anuncia despues.

Cupcake di Speransa 2025

Nos ta dilanti otro celebra-
cion di Dia di San Valentin
y dilanti otro bunita proyec-
to di "Cupcake di Speransa
2025" celebrando su decimo
aniversario.

Un proyecto cu a start na 2016
den Caya Grandi para cu 200
Cupcake y cu aña tras di aña a
keda crece.

Na aña 2016 e fondonan recauda
tabata pa Baby Luna, na 2017 na
Sra. Koolman, na 2018 dedica
na 2 Fundacion pa mucha, na
2019 pa Ethan, na 2020 dedica
na Ethan un biaha mas y tambe
Guinni, na 2021 pa Shady, na
2022 e Cupcake di Speransa a
bai pa Janelle, na 2023 dedica
na Aljereau y na 2024 dedica na
Famia Rasmijn y Baby Jeremiah
y pa aña 2025 esaki lo wordo
dedica na un hoben special di 15
aña yama Richeline.

Richeline ta un hoben special
cu autismo y durante e ultimo
añanan aki a cuminsa sinti dife-
rente sintomanan cu ainda dok-
ternan mes ta purba saca afo kico
e tin precies y den e caso aki su
sra. Mama ta buscando e forma
pa asina por biaha cune den exte-
rior pa check un Segundo opin-
ion kico por ta e causa di male-
starnan di su yiu. Segun e mama
ta conta nos cu e color di cuero
di e hoben ta cambia, e ta cay



flauw constantemente, y ta pen-
sa tambe cu e lo a haya un atake
cual ta haci cu e ta debil constan-
temente y ta drumi masha hopi
mes, siendo cu Richeline tabata
un mucha hopi activo yena di
energia awor hasta den un rol-
stoel e ta mobilisa de vez en cu-
ando paso e no tin forsa den su
pianan.

Abo tambe por ta parti di e yu-
dansa aki pa Richeline door di
cumpra Cupcake di Speransa
2025. E minimo di order ta 1
dozijn (12 Cupcake) pa 60 florin
y bo mag di bestel cuanto cu ta
desea. Un bon opcion pa ami-
gonan comerciante cumpra pa
nan empleadonan y clientenan y
tambe den famia por haci esaki.
Lo parti e Cupcakes dianan 13 y
14 februari y lo entrega esakinan

na cas of trabou.

Pa bestelling por manda un
WhatsApp 561-61-51 cerca
George y bestel esun di bo, por
paga cash dia di deliver y tambe
por paga via online tambe cuenta
ta Aruba Bank y e cuenta ta 600-
648-0190 tambe si ta desea di
por contribui cu algo monetario
por haci esaki.

GLW Foundation ta contento di
por sigui aporta cu boso ayudo
pa un otro hoben por sigui check
su salud den exterior.

Aruba ban uni un biaha mas pa
asina nos por yuda un hoben pa
busca su salud.

Ban celebra e Dia di San Valen-
tino aki comiendo un dushi bolo
y demostra bo amor y Amistad
na un otro persona, bestel esun
di bo awor mes 561-61-51.

HCLF kier scucha di bo: Yuda forma parti di e siguiente podcast pa hoben

Despues di 4 aña, Heart-Cen-
tered Leadership Founda-
tion (HCLF) ta trece bek su
podcast di hoben pa hoben
"VOX: voice of youth making
an impact"

HCLF ta kere den e balor di
brinda hobennan un platafor-
ma unda nan por uza nan bos
pa inspira y crea un impacto.
Un di e maneranan cu HCLF
ta traha riba esaki ta cu su pod-
cast pa hoben. Na final di 2019,
HCLF a lansa e podcast VOX
cu meta pa amplia e bos di ho-
ben y stimula nan participacion
den temanan cu ta importante.
E aña aki HCLF ta trece e pod-
cast bek cu un concepto nobo y
ta en busca di hobennan cu lo
kier forma parti di e podcast: sea
dilanti camara of patras. Pa ho-
bennan, esaki ta un oportunidad
pa desaroya diferente habilidad,
entre otro engrandece nan con-
fiansa pa expresa nan mes of uza
nan talento of pasion pa traha cu
camara, zonido y filmacion di e
podcast.

HCLF ta den su fase di pre-
paracion y ta haci un invitacion
pa hobennan cu ta interesa den



forma parti di e podcast pa un se-
sion tipo "think tank". Durante
e sesion aki, nan lo por conoce
e concepto di e podcast di cer-
ca, comparti nan ideanan riba e
topiconan di e temporada nobo,
y siña con por forma parti di e
produccion di e podcast VOX.
Hobennan y hobennan adulto di
13 pa 30 aña por participa den e
sesion 'think tank'.

E sesion 'think tank'i ta tuma
luga diabierna, 24 di januari 2025
na Teresita Center, di 10:00 am
pa 12:30 pm. Participacion ta
completamente gratis. Hoben-

nan cu ta interesa di forma parti
di e sesion por registra door di
manda HCLF un whatsapp na
+297 5841211 of via HCLF su
website [www.hclfaruba.org/our-
events](http://www.hclfaruba.org/our-events)

Tocante HCLF:

HCLF ta un fundacion cu a keda
estableci na 2008 cu e meta pa
inspira y empodera hobennan di
Aruba. Desde 2012 e fundacion
ta ofrece diferente tayer, activi-
dad y programanan impactante
unda hobennan ta cera conoce
nan mes miho y traha riba nan
desaroyo personal y profesional.

Trump ta wanta tarifa pero ta bisa cu decisionnan riba su prome dia como presidente por reduci prijs di coriente y calma inflacion

(AP)—Presidente Mericano nobo Donald Trump ta wantando e tarifanan durante su prome dia y a bet cu su accionnan ehecutivo por reduci prijs di coriente y calma inflacion. Pero no ta claro si su ordennan lo ta suficiente pa move e economia Mericano manera el a priminti.

“E crisis di inflacion a ser causa pa un exceso den gasto,” Trump a bisa den su adres inaugural mientras el a sugeri cu pa aumenta produccion di azeta lo reduci prijs. Ordennan suministra ayera, incluyendo un conecta cu Alaska, ta diseña pa calma e presion regulatorio riba produccion di azeta y gas natural. Tambe e tin e intencion pa declara un emergencia di energia nacional cu e speranza pa acelera mas produccion di energia den competencia cu China pa expande tecnologia manera inteligencia artificial cu ta depende riba centronan di data usando un cantidad masivo di energia.

Trump tambe a firma un orden directivo bisando agencianan federal pa conduci un evaluacion di 30 dia tocante con nan por yuda reduci e costo di vivienda, cuido

medico, cuminda, energia y material pa cas como tambe pa haya manera pa trece mas hende den e sector laboral.

Den un yamado ayera cu reporteronan, un oficial di e Cas Blanco a bisa cu e administracion nobo tambe lo trece un fin na loke Trump ta yama incorrectamente un “mandato” pa vehiculonan electrico. Mientras cu no tin ningun mandato asina pa forsa e compra di vehiculonan electrico, e politicanan di ex-presidente Joe Biden a busca pa curasha Mericanonan pa compra EV y companianan di auto pa cambia for di vehiculonan di gas pa autonan electrico.

Trump, durante su campaña y despues cu el a gana e eleccion na november, a menasa tarifa riba China, Mexico y Canada, como tambe otro paisnan. Pero ta parce cu ta wantando esakinan aden. E oficial a referi na un articulo den e Wall Street Journal bisando cu Trump lo solamente firma un memorandum bisando agencianan federal pa studia asuntonan di comercio.

Asina mes, Trump a priminti den su adres inaugural cu



tarifanan ta biniendo y a bisa cu paisnan lo ta pagando e tarifanan di comercio, aunke cu importadornan domestico ta pagando impuesto caba y frecuentemente ta pasa esaki na e consumidornan. Trump a bisa mas despues ayera cu e tarifanan lo “haci nos hopi rico.”

E decision pa pausa y studia tarifa tabata un señal pa e gobierno Canades cu e mester ta prepara pa casi tur posibilidad riba e direccion di comercio cu Merca.”Kisas el a tuma de-

cisionnan pa suspende e menasa di tarifa riba varios pais. Nos lo mester warda y mira,” segun minister di Finanzas Canades, Dominic LeBlanc a bisa. “Sr. Trump tabata impredecible den mandatonan anterior, pues nos trabao ta pa sigura cu nos ta cla pa cu-alkier scenario.”

En general, e Republicano ta enfrenta un variedad di reto pa cumpli cu su ambicionnan pa baha prijs. Biden a logra baha e inflacion durante dos aña pero el a sali for di e ofi-

cina presidencial asina mes cu e crecimiento di prijs ainda superando salarionan durante e ultimo cuatro aña.

Un stimulo di inflacion ta un deficit persistente den vivienda, y produccion di azeta ya ta riba nivelnan record, cu productornan enfrentando incertidumbre tocante demanda global e aña aki. E Reserva Federal ta tecnicamente e organismo gubernamental encarga pa mantene inflacion na aproximadamente 2% anualmente.

China ta bisa cu el a negocia un alto-el-fuego entre ehercito di Myanmar y grupo di rebelde etnico

(AP)—E gobierno militar di Myanmar y un grupo di rebelde etnico den e parti noreste di e pais a firma un acuerdo di alto-el-fuego, segun mediador China a bisa ayera.

E alto-el-fuego entre e ehercito y e Myanmar National Democratic Alliance Army (MNDAA), cual a tuma gran parti di teritorio cerca di e frontera cu China, ta e segundo pacto asina den un tiki cu un aña y a bin den efecto diasabra. Un pacto anterior den januari aña pasa no a ser honra pa ningun banda.

E alto-el-fuego nobo a ser negocia pa China mey januari, segun vocero pa e ministerio di Asunto Exterior, Mao Ning, den un informe diario na Beijing. China ta e aliado mas importante di e gobernantenan di e ehercito di Myanmar, ken a tuma poder despues di kita e gobierno di Aung San Suu Kyi na febru-

ari 2021. E toma a resulta den manifestacionnan pasivo den e nacion cu a escala den un guerra civil.

Beijing tin interes geopolitico y economico grandi na Myanmar y ta extremadamente preocupa tocante instabilidad asina cerca di su frontera. “Nos ta spera cu tur partido lo mantene e momentum di e alto-el-fuego y discusionnan di paz, implementando sinceramente compromedimento comun cu ta existi actualmente, tuma iniciativa pa desescala e situacion den e pais, y sigui negocia y yega na solucionnan via dialogo,” Mao Ning a bisa.

El a agrega cu China ta para cla pa activamente promove discusionnan y duna sosten pa e proceso di paz den e norte di Myanmar. E no a revela detayenan y e gobierno di Myanmar no a comenta inmediatamente riba e alto-el-fuego.

E MNDAA, cual ta consisti di e minoria Kokang Chines, a anuncia aña pasa un alto-el-fuego unilateral den su conflicto cu e ehercito y a haci yamado pa un dialogo bao auspicio Chines. E grupo ta un miembro di e Three Brotherhood Alliance cu a lansa un ofensivo sorpresa cerca di e frontera cu China na october 2023.

Ta parce cu originalmente China lo duna sosten tactico na e ofensiva ora a parce cu esaki lo yuda su meta di eradica wega di placa ilegal y operacionnan di estafa online organisa pa gangsternan Chines den e parti noreste di Myanmar. Pero e ofensiva tambe a debilita e control di e ehercito di Myanmar den otro partinan di e pais.

E rebeldenan etnico ta bringando pa decadas caba pa autonomia for di e gobierno central di Myanmar y ta



aliado di e People’s Defense Force, e resistencia pro-democracia forma despues cu e ehercito a tuma control na 2021.

Na januari aña pasa, Beijing a usa su relacion cu ambos e ehercito y e gruponan di Three Brotherhood pa negocia un alto-el-fuego den e estado norte di Shan, cual a dura pa cinco luna te ora cu e aliansa etnico a cuminsa cu nan ofensiva atrobe na juni, acusando e ehercito di viola e

acuerdo.

China a expresa su dessatisfaccion cu e atakenan nobo di e rebeldenan por medio di cerca crusadanan riba su frontera, cortando coriente den ciudadnan di Myanmar y tumando otro medida pa caba cu e bringamento. China a habri su fronteranan back cu ta conecta cu e areanan controla pa e MNDAA y e United Wa State Army, un otro grupo rebelde den e estado Shan, segun media local.

Rikesa di biyonarionan a aumenta den 2024, segun grupo anti-pobresa mientras e elite ta prepara pa un otro reunion na Davos

(AP)—E rikesa di biyonarionan a crece tres biaha mas lihe den 2024 compara cu e añan anterior, segun un grupo anti-pobresa a bisa ayera mientras cu e elite politico y financiero di mundo ta prepara pa un reunion anual na Davos, Suisa.

Oxfam International, den su evaluacion recien di desigualdad global prome cu e apertura di e reunion di World Economic Forum, tambe a pronostica cu al menos cinco triyonario lo surgi durante e proximo decada. Un año pasa, e grupo a pronostica cu solamente un triyonario lo aparece pa e tempo ey.

E investigacion di Oxfam ta agrega peso na e advertencia di ex-presidente Joe Biden siman pasa di un “concentracion poderoso di poder den man di e grupo chikito di hendenan ultra-rico.” e rapport di e grupo, titula “Takers Not Makers,” tambe ta bisa cu e cantidad di hende den pobreza apenas a move hopi desde añanan 1990.

E World Economic Forum ta anticipa di anfitriona aproximadamente 3,000 participante, incluyendo ehecutivonan empresario, academiconan, oficialnan gubernamental y lidernan di grupo civil na su reunion anual den e pueblo Alpino di Davos. E prome dia di reunion ta cuminsa awe, despues di e apertura ceremonial ayera.

Con lo participantenan di Davos responde na e inauguracion di Trump?

Ta probable cu e regreso di Donald Trump na e Cas Blanco lo ta un topico di combersacionnan formal y e



remarcanan improvisa. Expertonan di politica ta participando den un panel awe mainta titulo “47th US Presidency, Early Thought” (di 47 presidente Mericano, Prome Pensamentonan) y un reunion municipal titulo “State of Play: US Dollar (Estado di situacion: Dollar Mericano).

Presidente Ucrainiano Volodymyr Zelenskyy, presidente Sur Africano Cyril Ramaphosa, presidente Israeli Isaac Herzog, Canciyer Aleman Olaf Scholz y presidente di e Comision Europeo Ursula von der Leyen ta programa pa duna discurso na Davos awe.

Presidente Aleksandar Vucic di Serbia, un simpatizante di Trump, a tuma un actitud di warda-y-mira prome cu Trump duna su adres inaugural. Vucic a bisa cu e y su equipo lo pasa e dia analizando e discurso.

“Tur hende ta spera cu Trump lo trece un ambicion nobo y energia nobo” pa resolve e guerra di Rusia y Ucrania, e lider Serbia a conta The Associated Press. “Mi ta spera



cu Trump lo haci algo den termino hopi concreto.”

Activistanan anti-pobresa ta preocupa pa un “aristocracia nobo” na Merca y otro luga

Trump a gaba acumulacion di rikesa pa basta tempo caba—incluyendo di su mes—y ta conta multibiyonario Elon Musk como un top consehero. “Loke bo ta mirando e momento aki ta un presidente biyonario tumando e huramento awe, sosteni pa e homber mas rico. Esaki ta basicamente e hoy den e corona di oligarkianan global,”

segun Amitabh Behar, director ehecutivo di Oxfam International, a bisa den un entrevista, refiriendo na Trump y Musk.

“Esaki ta tocante un individuo specifico. E ta e sistema economico cu nos a crea unda biyonarionan awor por manipula politicanan economico, politicanan social, cu eventualmente ta duna nan mas y mas beneficio,” el a agrega.

Manera e yamada di Biden pa obliga e biyonarionan “ta cuminsa paga nan pida husto” via impuesto Mericano, Oxfam—un grupo di abogacia global—a haci yamado na gobiernonan pa pone e hendenan mas rico paga impuesto pa reduci desigualdad y rikesa extremo, y pa “desmantela e aristocracia nobo.”

E grupo a haci yamado pa stapnan manera e separacion di monopolionan, limitando pago pa CEO y regulacion di corporacion pa sigura cu nan ta paga “salarionan adecua” pa trahadornan.

Con esnan pover ta pasando?

Hopi inversor a haya ga-

nashi grandi den 2024, cu prestacionnan fuerte pa top companianan tecnologico y indexnan di e stock-market manera e S&P 500, como tambe e prijs di oro y crypto-moneda manera Bitcoin.

Oxfam a bisa cu e rikesa di biyonarionan a crece pa 2 triyon dollar año pasa, of aproximadamente 5.7 biyon dollar pa dia, tres biaha mas lihe compara cu 2023. E cantidad di biyonario a aumenta cu 204 pa 2,769, y e top 10 hombernan mas rico a mira nan rikesa aumenta cu casi 100 miyon dollar pa dia, el a bisa.

Citando data for di e Banco Mundial, e grupo a referi na pobreza persistente, bisando cu e cantidad di hende bibando riba menos cu 6.85 dollar pa dia “apenas a cambia” desde 1990. Oxfam a usa e lista di Forbes, “Real-Time Billionaire List” desde fin di november pa data riba e ultra-rico.

Pa compara, al menos cuatro biyonario nobo a haya mas rikesa tur siman den 2024, y tres-quinto di rikesa biyonario ta bin for di herencia, poder monopoly y “conexionnan amiguismo,” el a bisa.

Lo e reunion na Davos continua manera normal e año aki?

Apesar di e buraco grandi entre esnan rico y pover, e reunion anual lo probablemente enfoca atrobe riba placa y acuerdonan financiero, cu lidernan fuerte den paisnan Occidental birando mas popular y causanan progresivo manera diversidad y cambio di clima birando menos importante den e mundo empresario.

E continuo aumento di inteligencia artificial como un herment pa negoshinan logra mas eficiencia lo atrobe ta un topico central na Davos, apesar di preocupacionnan den hopi sector cu IA por caba cu hopi trabaonan y kita trahadornan den varios industria.

Manera e ultimo añanan, manifestadornan haciendo yamado pa mas igualdad economico, impuesto pa esnan rico y otro demanda a subi caya. Algun a blokea caminda pa Davos, strobando trafico y e yegada di algun participante di Davos.

